

ISIDORI BACCHETTI

R O M A N - I

PHILOSOPHI, AC MEDICI

I N L O C U M Q U E M D A M

Disputationis *de Societate Mentis, & Corporis*,
a doctissimo viro Urbano Tosetto Romæ habitæ
Anno 1754. in Collegio Nazareno,

A N I M A D V E R S I O N E S

A D V I R U M C L A R I S S I M U M

BENEDICTUM STAY

Rhetorem, Poëtam, ac Philosophum, atque in Romano
Archigymnasio Rhetorices, & Humaniorum
Litterarum professorem.

*Dissentientium inter se reprehensiones non sunt
vituperandæ: maledicta, contumelia, tum
iracundia, contentiones, concertationesque
in disputando pertinaces, indignæ mihi
Philosophia videri solent. Cicero
de Finibus Lib. I. cap. 8.*



R O M Æ M D C C L V .

EXCUDEBAT GENEROSUS SALOMONI

P R Æ S I D U M F A C U L T A T E .



ISIDORUS BACCHETTUS BENEDICTO STAY SUO

S. D.



ON eram nescius, Benedicte Stay, cum libros de *Re Metaphysica* præstantissimi Philosphi Aloysii Antonii Verneii vix in lucem editos volutarem, fore ut verissima philosophandi ratio in aliquas reprehensiones incurreret, tum eorum, quibus tota hæc displicet Recentiorum via ac methodus, nec nisi veteres logomachias amant; tum etiam Recentiorum quorundam, qui tametsi optimis studiis polito, atque omni laude cumulati, tamen ex præjudicata sententia judicare, omniaque aliorum cogitata ad hypotheses suas revocare solent. Quod ipsum tam cito, & quod plus est, in Urbe hac gravissimorum Philosophorum altrice, clarissimo viro evenisse, haud ita pridem non sine animi dolore animadverti. Nam cum ego *Disputationem de societate Mentis & Corporis*, ab amico homine Urbano Tosetto Philosophiæ professore in Urbe habitam, forte fortuna legerem, inveni pag. 17. Tosettum nostrum de Verneii item nostri sententia quadam non obscure conqueri, quasi ab eo injuria esset refutatus: tum dedita opera Verneii opinionem unam, & item alteram expendere, & confutare sibi proposuisse. Mirabar, neque enim causam ullam veram falsam in Verneii verbis a Tosetto descriptis reperire poteram. Itaque cum Verneium ad manus non haberem, tacitus sic mecum cogitare cæpi. Quid? Verneius, qui Tosetti

4
fetti sodales ex animi sententia diligit; qui eos, cum se offert occasio, laudat; (1) qui plures apud eos habet amicos, quorum aliqui, iique doctissimi; ejus Philosophiam in scholis exponunt; alii & Disputationibus suis eum laudant, & Dissertationes admodum eruditas pro concione habitas eidem inscribunt; alii eum omni amoris demonstratione humanissime prosequuntur; uni Tosetto, de cujus peritia in Philosophicis eundem sapissime prædicantem audivi; uni, inquam, Tosetto, vir mea sententia omnium humanissimus, ac pacis amans, se adversarium ostendet? hic certe aliquid monstri latet. Quid multis? domum inde recta venio ut Verneii loca consulerem: cumque diu, attenteque *Metaphysicam* lætitarem, quæ mihi ex assidua lectione erat notissima, nec Tosettum nominatum, nec *Dissertationem* illam primam suam, nec verba ulla Tosetti iisdem, aut diversis descripta litteris, citata legi. Quid plura? ne unum verbum quidem inveni, quod ad Tosettum pertineret. Nil enim aliud habet Verneius nisi: *Aliqui Recentiores gravissimi cum pro certo ponant &c.* idque obiter in adnotatione ad oram libri habet: & ibi nominat oppositæ sententiæ patronos, *Cudworthum*, *Morum*, *Rudigerum*, quos ego in Bibliotheca Verneii non semel tantum me vidisse memini.

Hæc me certe majori admiratione compleverunt: & tamen aliquam causam reperire volupe erat, ne Tosettum, hominem & sapientem, & moderatum, levitatis, ac imprudentiæ condemnarem. Quid? cogitabam rursus, si Tosettus per errorem sibi persuasit, *Metaphysicam* Verneii, quæ post suam *Disputationem* in lucem edita est, ejusmodi lucubrationem pro scopo habere debuisse? quid si Verneius Tosetti disputationi adfuit, vel talem lucubrationem legit, idque ipe vel vidit, vel cognitum habuit? At hæc satis erant ut Tosettus judicaret, notum esse Verneio, eum in eadem sententia esse cum *Recentioribus illis gravissimis*: minime vero ut nobis pro certo affirmaret, *se a Verneio peti*, & refutari: atque hoc solo nomine in Verneium in-
vehe-

(1) Vide Verneii *Apparatum* pag. 177. & 303. & *Logicam* pag. 256. ubi Corfinium laudat: & pag. 361. in not. Et *Metaph.* l. 4. pag. 233., & sæpe alibi.

veheretur: cum ejusmodi opinio adeo vetus sit, ut non-
 dum nato Tosetto nostro, jam in scholis inveterasset. Quid
 te morer pluribus? Verneium ipsum adii, ut ab eo cogno-
 scerem, an ipse Tosettum in aliquo offendisset; sin mi-
 nus, an defensionem aliquam pro se scribere vellet. Qui
 utrumque constantissime negavit, & se talia scribendo de
 Tosetto cogitare debuisse, & ullam se apologiam de tali-
 bus nugis scripturum. Si *Tosettus*, inquit, *amico animo*
in nos peccavit, & imprudens fecit, aliquid & amicitiae,
& praeclarissimo sodalitis dandum est. Sin inimico animo
prior laesit, & affectu aliquo ductus haud digno tali viro nos
vellicare constituit, non est meum injurias injuriis vindica-
re. Eo magis, quod qui legat attente librum 2. in quo de
natura, ac usu Metaphysicae disputo; atque loca ipsa a To-
setto adducta perpendat, & cum praecedentibus, & conse-
quentibus conferat, majori illustratione opus non habeat.

Hoc ego moderatissimi hominis lenissimum responsum
 laudavi, sed imitari non potui. Aliæ enlm, & graviôres
 causæ me movebant, ut defensionem aliquam parerem:
 Nempe is ego eram, qui Verneii *Metaphysicam* & Adole-
 scentibus bonæ Philosophiæ studiosis proposueram legen-
 dam, & aliquibus viris doctis laudaveram: qui si forte
 Tosetti *Disputationem* legerent, & animadverterent, quan-
 to supercilio, ac fastidio talem sententiam, ne dicam in-
 tegrum librum, exceperit; Tosetti professoris celeberrimi
 auctoritate moti, nec re, ut fieri solet, accurate exami-
 nata, fortasse de Verneii judicandi acie male suspicaren-
 tur. Et is erat Verneius, quem ego omni observantiæ,
 atque amoris significatione prosequi debebam. Nam a quo
 tempore in ejus notitiam perveni, meque in amicorum
 numero esse jussit, nullum non ab eo in me officii genus pro-
 sectum est: multa etiam beneficia extitere, quæ me mirifice
 sublevarunt. Ille enim me facientem erexit: ille rebus meis
 dissidentem confirmavit: ille mihi aditum ad plures viros
 gravissimos aperuit: ille viam compendiarîam monstravit,
 qua ad graviorum disciplinarum adyta pervenire possem:
 quid multis opus est? Ille se mihi & verbis, & re præsti-
 tit, amicum, defensores, patrem. Quare cum tot, ac
 tantis ejus in me meritis nulla occasio mihi fuerit gratiam
 referendi, nec quæ sub ejus nomine in lucem proferre de-

creveram, hucusque absolvere, & edolare potuerim; æquum erat ut eam ego occasione e manibus elabi non sinerem, quæ mihi præter cæteras justitiæ nomine se commendabat. Itaque Verneii sententiam defendendam mihi sumpsi: non id quidem altercandi studio, aut Tosettum, quem ego merito suo diligo, petendi; sed ut iis, qui Tosetti *Disputationem* legerunt, planum facerem, quam male ipse Verneii nostri sententiam sit interpretatus, quantaque injuria virum clarissimum ea de causa refutare conatus sit. Sed ut omni me invidia liberem, adducam verba ipsa omnia Tosetti, eaque claritatis gratia in capita disperstiam, singulisque animadversiones subjungam, ut facile judicare possis, uter melius philosophetur. Ita enim laudata *Disputatione de societate Mentis & Corporis* pag. 17. Tosettus disputat.

I. „ Anima hominis si re ipsa agit in corpus, illi sal-
 „ tem cerebri regioni præsens sit oportet, in qua nervo-
 „ rum capita coeunt, vel quasi coeunt. Etiam si vero in
 „ unum punctum coirent, semper est punctum physicum
 „ & extensum. Hanc ergo regionem tota occupat anima
 „ præsentia sua. Hanc ipsam argumentationem (*addit To-*
 „ *settus in nota*) in lucubratione Philosophica an. 1751.
 „ edita iisdem fere verbis exposui, cum de simplicium
 „ substantiarum extensione controversiam agerem. Eam
 „ carpit, & fallaciæ insinuat vir humanissimus Aloy-
 „ sius Antonius Verneius in eo, quod *de Re Metaphysica*
 „ an. 1753. vulgavit opere *lib. 4. cap. 7. in not.* Placet au-
 „ tem integrum doctissimi auctoris locum exscribere, ut
 „ totam ejus censuram ob oculos legentium ponam, &
 „ siquidem fieri possit, refellam; vel saltem observantiæ
 „ hoc meæ, & exstimationis testimonium viro clarissimo
 „ exhibeam. *Aliqui Recentiores clarissimi* (hoc vocabu-
 „ lum consulto omisit Tosettus, puncta substituens, quo
 „ facilius lectori persuaderet, se ibidem a Verneio desi-
 „ gnari) *cum pro certo ponant, ex re non extensa exten-*
 „ *sam fieri non posse, putant extensionem, & simplicita-*
 „ *tem, una esse posse: ideoque contendunt, elementa corpo-*
 „ *rum esse substantias simplices, & extensas. Si rationem*
 „ *queris, audies hanc esse, quia non intelligunt, quo mo-*
 „ *do infinitæ partes in una & exilissima materia parte con-*
 „ *tineri*

7
 „ tineri possint : propterea ridet Cartesianos , Newtonia-
 „ nos , ceterosque , qui divisionem in infinitum amplexan-
 „ tur . Sed , pace eorum dicam , mihi videntur ipsi male
 „ philosophari . Non intelligo , inquiunt , divisionem in in-
 „ finitum . Igitur negare debeo proprietates materiae , quas
 „ clare intelligo . Pulchra fallacia ! ex infinito , quod mor-
 „ talis nemo intelligit , ad rem omnino perspicuam argu-
 „ mentari ! Hanc si admittimus philosophandi viam , innu-
 „ me ras res omnino perspicuas negare deberemus , quod eas
 „ non intelligamus : immo vero fere omnia phaenomena phy-
 „ sica , quae , si ingenui esse volumus , fateamur necesse est ,
 „ nobis impervia esse . „ Hæc Tossettus .

ANIMADVERSIO.

Nempe huc redit Tossetti nostri ratiocinatio . Vernelius laudat generatim aliquos Recentiores gravissimos ; non nominat Urbanum Tossettum , non excribit verba ulla Tossetti , non citat nisi tres auctores , ex uno & viginti , quos eadem adnotatione laudat Tossettus ; (1) non enumerat omnia argumenta Tossetti , nec eodem ordine , quo ille posuit ; non propulsat rationes omnes , quas Tossettus affert ; tantum per viam tangit opinionem quamdam , quæ vetus jam erat ante natum Tossettum . (2) Ergo humanissimus Vernelius sibi proposuit confutare locum illum Disputationis Tossetti . O exi-

A 4

miam

(1) Nempe Leibnizium , Asta Eruditor. , Wolfium , Genuensem , Leucippum , Democritum , Simplicium , Plutarchum , Aristotelem , Hamelium , Muschenbroekium , Danielem , Cartesium , Clarkium , Cudworthum , Petavium , Rudigerum , Buddenm , Morum , Keillium , Graveffandium .

(2) Duplex hic tangitur præcipue opinio a Vernelio . Altera est , prima elementa corporum seu materia esse extensa , & indivisibilia , seu esse atomos extensas . Hæc autem opinio plurium veterum fuit , maxime Democriti , & Epicuri , qui alio & alio modo eam poliverunt : qui tamen veras partes in atomis ponebant , sed ob defectum vacui indivisibiles faciebant , verum mente divisibiles . Ex Recentioribus præ ceteris Gassendus eam defendit , ejusque affectum . Sed elapso sæculo Derodon *Disput. de Atomis* , & Gaspar Wyssius in *Curs. Philosoph. part. 2. an. 1669.* itemque Stair in *Physiologia Nova Exp.* quæ Latine prodiiit an. 1686. Lugd. Batav. veterum quorundam opinionem suscitavit , defenderantque , materiam

GENO

miam ratiocinandi formam ! Hanc certe non dico Aristoteles, sed nec Stoici illi, aut Megarici, acutissimi Sophistæ, umquam probassent. Nempe Tolettus noster judicavit, verba illa, *Aliqui Recentiores gravissimi*, non alium nisi se petere ! Quid hic responsione opus est ? quis nunc non videt, quam verum sit vetus illud, *Qui amant ipsi sibi somnia fingunt* ? Sed cetera audiamus.

II. „ Eere.

constare ex atomis non solum re ipsa, sed mente prorsus indivisibilibus, adeo ut singula puncta materiæ nec extensionem habeant, nec magnitudinem, quasi essent puncta Mathematica. Quam sententiam ipse Stair tribuit Platoni, & Zenoni : ex Recentioribus vero Galilæo, Cordemmo, Hamelio, aliisque : sed fallitur : sed forsitan aliqui alio modo disputarunt ; alii aperte id negarunt : præsertim Zeno, qui aliquam magnitudinem illis dabat, ut recte Fonseca in *Arist. Metaph. l. 3. c. 4.* Non dissentit Leibnizius, qui monades suas puncta metaphysica vocat. Sed bene Libertus Fromondus de *Compositione continui* perspicuis argumentis ostendit, ejusmodi puncta Mathematica esse commenta.

Altera opinio est, *esse aliquid extensum, quod non sit solidum*. Hæc etiam vetustissima est : talemque maltorum de *Angelis* sententiam fuisse, docet Cudworthus *System. cap. 5. sect. 3.* per totam, & ibid. Mosheimus §. 26. seqq. *Animos autem & simplices, & extensos* ex Veterum, ac Recentiorum quorundam sententia probabile judicat Cudworthus ibid. §. 52. Immo Mosheimus ibi ad §. 41. ait : *Us hodie, isa tum temporis* (nempe post medium elapsi sæculi) *magni nominis Philosophi tam inter Britannos, quam alios populos hac de re inter se dimicabant*. Veluti Henricus Morus, qui *Enchiridii Metaph. p. 1. cap. 27. a. n. 5.* Londini 1671. ostendere conatur, Deum, & Animam, & omnes spiritus esse extensos. Immo in Galliis cum Petrus Petitus libro de *Extensione animæ & rerum incorporearum Parisiis 1665. 8.* negaret contra la Chambre extensionem ; eidem se opposuit la Chambre libro inscripto, *Defense de l'Extension, & des parties libres de l'Âme. Paris. 1666.* quo libro, ut etiam in alio, *le système de l'Âme*, tot ineptias scribit, nempe animam habere partes entitativas, tum aliquas partes animæ non esse unitas corpori ; ut nihil ineptius me legisse putem. Addi his debet Du Hamel ; nec non Honoratus Fabri : ut alios omitam, qui id ipsum sæculo superiori defenderunt. Quibus ex nostro sæculo Tosca addendus, qui animam per totum corpus extensam facit. *Metaph. Reals l. 1. c. 4. prop. 30. Valentia 1721.*

Tertium vero illud, quod hic obiter memoratur ; nempe *animam præsentem esse nervorum capitibus in cerebro*, sententia est omnium Recentiorum a Cartesio usque, qui animam in cerebro totant, ubi nervi desinere illis videntur, ejusque sedem faciunt vel *glandulam pinealem*, vel *septum lucidum*, vel *corpus callosum*, vel *centrum ovale* &c. Audi Cartesium de *Passionibus part. 1. art. 34.* ibi : *Glandula illa, quæ est præcipua*

II. „Egregie profecto (pergit Tossettus) si mea hæc
 „esset, quam Verneius impugnât, ratiocinatio. Scripsi
 „utique: *Quis denique sibi suadet, parvum materiæ cu-*
 „*bum usque adeo in quadratas plagulas dividi posse, ut*
 „*orbi Universo, si Deo libeat, tegendo par sit?* (1) At hoc
 „dumtaxat argumento, quod procul dubio scjunctum a
 „ceteris, mancum est & elumbe, tota illa mea ratioci-
 „natio non continetur. En totidem verbis excerpta, quæ
 „illud absque ulla interjectione præcedunt. *Si substantia,*
 „*ut par est, simplex aliquid, & inconcretum dicatur,*
 „*nulla erit in toto mundo corporeo substantia; nec aliud,*
 „*quam modorum congeriem sine substantia, in corporibus*
 „*deprehendemus. Præterea nulla erunt vel ipsi Deo pri-*
 „*ma corporum elementa.* Hæc plane argumenta duo, in
 „quibus vis maxima, aut ego fallor, posita est, Leibni-
 „zium virum acutissimum, quem eodem loco commemo-
 „ravi, impulerunt, ut corporum divisibilitatem in in-
 „finitum, eorumque partes actu infinitas negaret. Cur
 „autem in illud unum, quod mens corripitur & obrui-
 „tur, sed non vincitur, Verneius animadverterit,
 „reliqua autem duo ne leviter quidem indieaverit, divi-
 „nare vix possim. Ex his duobus unum demonstrationis
 „vim habet. *Si substantia simplex aliquid, & inconcre-*
 „*tum*

pua sedes anima, potest varie moveri ab anima, quæ talis est natura, ut in se tot varias impressiones recipiat prout etiam reciproce machina corporis ita composita est, ut hæc glans, ex eo quod varie movetur ab anima, aut qualicumque alia causa, impellat spiritus, qui illam ambiunt, versus peros cerebri &c. Et art. 35. ait: *imagines sensuum tendere ad idem punctum glandis, in quo nempe præsens est anima.* Quare & hæc sententia longe in scholis vetusta est. Sed de his infra largius disputabimus in nota ad numerum VII.

(1) Tossettus noster non animadvertit, parvum materiæ cubum, v.g. digiti transversi, si infinite dividatur, non dividi in partes, quæ sequent magnitudinem primi cubi, sed in partes proportionem subduplæ semper minores: infinitarumque partium cumulum non majorem molem constituere posse, quam erat cubus, ex quo decerptæ fuere: non enim nova materia créatur, sed ponimus cubum illam exiguum in partes minores, & minores in infinitum secari. Quemadmodum igitur si infinitæ illæ partes denuo uniri possent, constituerent cubum, cujus latus esset digiti crassitudo; ita si ponamus infinite dividi, numquam majorem molem efficient, quam primus cubus. Quod perspicuum est.

„ *tum dicatur* : quod ex acutioribus Metaphysicis ibi-
 „ dem (not. 1. ad §. 2.) statueram . „ Haftenus Tosettus .

ANIMADVERSI O.

En alius effectus amoris , atque observantiae Tosetti erga Verneium . Nempe tam penitus infixum erat Tosetti animo nomen *Verneii* , ut ubique Verneium se videre , ubique se alloqui putet : atque amice cum amico jocans , andabatarum more eum omni loco , & tempore se manu prehendere sibi persuadeat . Cum autem ad se redit , prorsus intelligit , hæc omnia phantasie ludos esse , nihil amplius . Sed joca missa faciamus . Nego , *Verneium sibi proposuisse consutare sententias ullas Tosetti* . Hoc sublato fundamento , tota , quæ super struitur , machina corruit , nec alia responsione opus habemus , quod supra demonstravimus .

Sed quoniam Tosettus tantum in Leibniziano fundamento roboris ponit , ut dicere non dubitet , *utrumque gravissimum esse* , primum vero illud *vim demonstrationis habere* ; videamus an res ita se habeat . Ego vero aperte dico , utrumque argumentum , mea sententia quidem , ne micam quidem verisimilitudinis habere : tantum abest , ut primum *demonstrationem* vocem , alterum *vi maxima præditum* .

Si substantia , inquit Tosettus , *ut par est* , *simplex aliquid & inconcretum dicatur* , *nulla erit* (si materiam infinite secari posse dicas) *in toto mundo corporeo substantia* . Cur ? quia (1) dabitur infinita rerum progressio , nec umquam in uno aliquo consistere poterimus , quod sit substantia . Igitur tota hæc repugnantia ad repugnantiam *infiniti absoluti* reducitur . (2) *Præterea* , inquit , *nulla erunt vel ipsi Deo prima corporum elementa* . Cedo rationem ?
 quia

(1) Leibniziani hic confugiunt ad defectum rationis sufficientis : sed hic defectus ex hoc fonte manat , quia esset infinita progressio , ut est manifestum . Et ita rem explicat Wolfius *Cosmologia* §. 229. loquens de compositione corpusculorum .

(2) *Infinitem absolutum* vocat Verneius illud , quod alii appellant *infinitem actum* , quo illud distinguat ab *infinitem potentiâ* , quod actum est finitum , sed potest infinite augeri .

quia si unaquæque pars dividi possit, iterum existet infinitus effectuum progressus. Ergo nulla erit ultima, quæ creari possit. Infinitum est impossibile: ergo & creatio elementorum. Itaque & hic ex *infinito absoluto* res tota deducitur, cujus repugnantia veluti principium evidens utrobique ponitur. Atque id ipsum confirmat ibidem Tossettus in hunc modum: *Hæc plane argumenta duo Leibnizium impulerunt ut corporum divisibilitatem in infinitum, eorumque partes actu infinites negaret*. Et clarius in prima illa lucubratione. (1) *Leibniziani non alia ratione infinitarum in omni corpusculo partium absurditatem vitare possunt, quam prima corporum elementa prorsus inextensa effigendo, proindeque figuræ quævis expertia, & magnitudinis*. Hæc ille.

Audi nunc jam, doctissime Stay. *Infiniti absoluti* nemo homo, nedum solus Leibnizius, habet notionem. Itaque, si recte philosophari cupit, de tali *infinito* nec affirmare aliquid, nec negare potest. (2) Ergo argumentatio Leibnizii est merus paralogismus: valet enim ac si diceret: *Ego de infinito absoluto nihil cognosco, nec constituere possum, an in creatis sit, an esse possit, an secus*. Et tamen ex eo, quod nullo modo intelligo, pro certo infero, corpora infinite dividi non posse, sed esse debere res aliquas simplices, quas substantias voco, quæ creari possint. Quis non rideret hominem tali modo disputantem? quis non miraretur cæcum natum pervicaciter negantem esse lucem, & colores, quod harum rerum nullam haberet ideam? Et tamen si Leibnizii argumentationem a præjudicio hypothesis suæ separas, in suas partes resolvis, easque probe consideras, cogno-

(1) In *Propositionibus Philosophicis* Romæ defensis in Collegio Nazarenò an. 1751. pag. 17. in not. quas a Verneio consutatas fingit Tossettus.

(2) Recte ex principio perspicuo aliquid perspicue inferimus, tametsi inde sequatur processus in infinitum. Male tamen ex infinito, quod non intelligimus, inferimus, *aliquid certo modo esse debere*. Tantum dicere possumus, admissio gratis infinito, non sequi esse veras propositiones contradictorias: id est, non posse gratis admitti tale infinitum, ex quo aperte sequantur contradictoria: quod ad illud primum revocatur, ut infra dicemus n. X. Vide Clarkium de *L'Existence de Dieu*. chap. 2. & 3. per totam.

cognosces ipsissimam hanc esse ratiocinationem . Est igitur paralogismus .

Audi reliqua . Hinc plane conficitur , quam male iudicavit Tosettus dum scripsit , illud argumentum Leibnizii a primis (nempe repugnantia *infiniti absoluti*) sejunctum *manum esse & clumbe* : si hoc dicere vult , aliquam , tamen minimam , probabilitatem habere . Nam tale argumentum Leibnizii a primis sejungi nullo pacto potest : propterea quia , si missam facimus repugnantiam *infiniti absoluti* , sunt verba inania .

Hinc etiam efficitur , quam recte Verneius noster , cum inter vias ostendere vellet , (1) inscite iudicare illos , *qui dicunt , extensionem , & simplicitatem in rebus corporeis una esse posse* ; non nisi de repugnantia seu impossibilitate *infiniti absoluti* sermonem fecerit : quia probe cognitum habebat , quidquid ab Adversariis opponitur , ex hoc fonte proficisci , impossibile esse *infinitem absolutum* . Quod non animadvertens Tosettus , Verneium de negligentia postulavit , quasi omnia adversariorum argumenta non infirmasset .

Sed redeo ad Leibnizii argumenta , ac illud rursus tibi dico , Stay , primum argumentum Leibnizii , quod tantopere extollit Tosettus , si alio aspectu consideretur , nihil aliud esse , quam puram putam *petitionem principii* . Huius repones , *petitio principii* ita profecto res est . Quod ut probe cognoscas , illud te considerare jubeo , quid illud est , quod a Philosophis in quaestionem vocatur . Nempe quaestio est , *an haec res , quae vocatur substantia , seu natura , seu essentia Physica corporis* (nam hoc sensu eam sumit Leibnizius , & ex eo Tosettus) *sit res simplex & inconcreta , an secus* . Negant ceteri : ait Tosettus , idque lepide assumit pro certo , quod tanta contentione animi disputatur . Si *substantia* , inquit , *ut par est , simplex aliquid & inconcretum dicatur , nulla erit in toto mundo corporis substantia , &c.* At hoc ipsum in quaestione est : *an par sit , quod substantia , id est essentia Physica corporis , simplex aliquid & inconcretum dicatur* . Hoc erat probandum , non quasi indubitatum assumendum . Aliter argumentatio Tosetti est

nuga-

nugatoria, quasi diceret: *Si substantia vocatur res simplex, non potest non vocari simplex: quod quis negat, aut quid ad rem facit?* (1)

Deinde quot in hac propositione verba, tot paralogismorum fontes se offerunt. Si enim pro tuo jure postulaveris exponant tibi, quid hoc loco significet *substantia*, quid *simplex*, quid *inconcretum*; clare cognosces, controversiam omnem ex varia interpretatione vocum proficisci, quam Scholastici vocant, *questionem de nomine*. Re autem vera Leibnizius ipse interrogationibus vexatus, quo erat pudore ingenuo, fateri non recusaret, se de interiori corporearum rerum systemate nihil scire, (2) vel id voces *substantiam*, vel *subjectum*, vel *essentiam*, vel *naturam*, vel *elementum*, vel *materiam*, vel *corpus*, vel *quantitatem*, vel *continuum*, vel quo alio nomine volueris. Itaque si obscuras voces removeas, & vocabulo *substantia* aliud subitituas, quod tot controversiis non sit expositum, v.g. *rem*, vel si non repugnas, *naturam*, seu *essentiam Physicam corporis*, seu *corpus*; vel saltem vocabulum *substantia* significatione magis vulgata sumas, *pro interiori materia rerum corporearum*, quid quid tandem illa sit; & illud examinandum tibi ponas, *an res*; *quam corpus vocamus*, *infinite dividi possit*, *an aliter*; tum apertissime intelliges, argumentationem Leibnizii nihil aliud esse, quam verba inania: cumque ideas illas suas abstractas, ac definitiones, re vera nominales, non reales, pro rebus Physicis nobis venditare. Sed ad Tossettum redeamus, ita enim scribit.

III. „ Ita-

(1) Re vera nugatorium videtur illud principium Leibnizii: *Si est substantia composita, est etiam simplex, aliter erit numerus sine unitatibus*. Forte in hypothesei Leibnizii aliquid momenti habebit: sed apud alios nihil efficit, nam hoc ipsum in questione est.

(2) Leibnizius suam ignorantiam in hoc negotio profitetur. Ait enim, se ad *Harmoniam praestabilitam* &c. animum adjunxisse, quod aliam hypothesein non reperiret, qua phenomena singula explicaret: *Oùtro vous ces avantages, qui rendent cette hypothese recommandable, ont peu de dire, que c'est quelque chose plus qu'une hypothese, puis qu'il ne paroît gueres possible, d'expliquer les choses d'une autre manière intelligible*. Leibnizius apud Journal des Savans an. 1695. pag. 460. Amsterd.

III. „ Itaque argumenti vis infringi non potest, nisi
 „ ea substantiæ definitio rejiciatur. (& recte quidem) At
 „ ea rejecta, quam subrogabimus ? (nullam, sed a philo-
 „ sophando de rebus omnino involutis, & inutilibus absti-
 „ nemus) Non quidem definitionem Verneianam, quam
 „ vitiosam esse nemo, ut arbitror, inficiabitur. „ (immo
 „ vero omnes, qui vocabula intelligant.)

ANIMADVERSI O.

Clare hic vides, Stay, propositum fuisse Tosetto ora-
 tionem quærere, atque fingere sibi aliquam causam pro-
 babilem improbabilem cur Verneium peteret, atque cum
 eo Peripateticorum more subtiliter decertaret. Nam ut
 argumentationem suam defenderet, non opus erat alias
 Verneii sententias consulto examinare, ut evidens est. Sed
 quam prospere illi cesserit, videamus.

IV. „ Substantiam, inquit, ipse (Verneius) definit (1)
 „ Essentiam separatam a suis modis. Verum non ignorat
 „ Verneius, non substantias tantum, sed etiam modos suam
 „ essentiam habere aliis modis affectam, qui ab ipsa essen-
 „ tia per mentis abstractionem separari queant. Cum ex-
 „ tensio corporum sit ens reale, realem quoque essentiam
 „ habeat necesse est. Extensio hæc autem variis modis
 „ afficitur, vel affici potest, ut norunt omnes. Ne autem
 „ propriis dumtaxat utar exemplis, aliud ex Verneio pro-
 „ feram. *Natura trianguli*, inquit, *in hoc sita est, quod*
 „ *fit figura tribus lineis definita. Quare si Deus ab æterno*
 „ *tempore cognovit, talem esse naturam rei, quam voca-*
 „ *mus triangulum; omnino fieri non potest, ut id, quod vo-*
 „ *camus eo modo, non habeat talem naturam: aliter eadem*
 „ *r's esset triangulum, & non esset.* (2) Eadem dicit de
 „ numero ternario. Constat autem triangulum infinitis
 „ fere modificationibus obnoxium esse. Si quis autem re-
 „ ponat, Extensionis, & Trianguli essentias ex Verneii
 „ sententia reales non esse; substituatur exempla lineæ, &
 „ superficiæ, quorum essentias, ut a Geometris expli-
 „ cantur, tamquam reales Verneius ipse producit, &
 „ pro-

(1) Metaphysicæ Lib. 4. cap. 4. pag. 138.

(2) Ibid. cap. 3. pag. 127.

„probat. (1) Lineis autem, & superficibus innumeras ac-
 „cedere posse modificationes, quis negat? Itaque si sub-
 „stantiæ definitionem a Verneio traditam adoptare veli-
 „mus; extensio, triangulum, linea, superficies, aliaque
 „multa horum similia, quibus sua est essentia, & modi
 „(hoc opus, hic labor est) ad substantiarum classem refe-
 „rantur oportet: quod absurdum, & falsum esse, Ver-
 „neius ipse fatebitur. „

ANIMADVERSI O.

Si Tosettus noster per quam meditate legeret Verneii libros, propositionesque ad auctoris systema, ut par erat, revocaret, non seorsum expenderet; haud ita turpiter laboretur, ut definitionem *nominalem* pro *reali* sumeret, nec tot res diversas hac una propositione misceret: propterea tota hac censura supersedere poterat.

Nempe Verneius, quamquam dum loquitur communiter cum aliis de *substantia*, eam sumat in vulgata adversariorum significatione pro re *physica*; tamen hoc loco aliorum opiniones examinans, ac ex propria sententia, & animadversione loquens, aliter sumit. Itaque eodem libro aperte distinguit *essentiam*, & *substantiam*. Tum *essentiam* dividit in *Physicam*, & *Metaphysicam*. *Physica* est, *cumulus proprietatum omnium, ex quo res est hæc, non alia*: (2) v. g. *essentia Physica & realis Hominis ea omnia complectitur, quæ re ipsa hominem constituunt*. *Essentia vero Metaphysica, ex quibusdam tantum ideis notioribus a mente nostra componitur*. (3) Ubi etiam monet, *Essentiam, & Naturam in rebus creatis idem significare*. (4)

Sequenti vero capite de *substantia* differit, & exponit, *Philosophos plerosque vocabulo substantia significare solere essentiam, seu naturam rei mente sejunctam ab iis modis, qui eam ornant*. (5) Ex quo infert, *substantiam secundum eos esse ideam relatam ad modos: propterea esse ideam abstractam, quia nulla existit substantia carens omnibus modis. Quare qui de substantia sine modis sumpta disputant, non de*

(1) Metaphys. ibid. coroll. 2. pag. 131. (2) Ibid. pag. 123. (3) Ibid. pag. 123. (4) Ibid. pag. 126. (5) Ibid. pag. 137. 38.

de re aliqua, quæ extra mentem sit, disputant, sed de abstracta idea, quæ tantum in eorum mente existit. Substantia enim, ut in Logica docuimus (nec sumit substantiam in vulgata acceptione, pro re physica) nullam aliam ideam habemus, nisi concipientes cumulum modorum, & proprietatum, adiungendo iis ideam obscurissimam naturæ nobis incognitæ. Et infra (1) ait, substantiam ea acceptione sine ullis modis internis esse non posse.

Poteratne clarius dicere noster, substantiam secundam ab omnibus modis, esse ideam abstractam; substantiam vero sumptam pro intima essentia Physicæ, seu natura rei, esse rem nobis incognitam? minime. Attamen hæc vel non vidit, vel legere dedignavit bonus Tosettus: quæ si animadverteret, intelligeret profecto, definitionem substantiæ, quam tradit Leibnizius, esse secundum eam definitionem essentiæ Physicæ: definitionem vero substantiæ a Verneio hoc loco traditam, esse definitionem nominis, quam nec ipse Leibnizius (si prejudicium suæ hypotheseos removeas) rejicere posset: nam substantia vacua omnibus modis, ut plerique eam sumunt, non nisi in mente cogitantis existit. (2) Secus ostendere debuisset Tosettus, ubinam gentium existit substantia vacua omnibus modis, & magnam illi haberemus gratiam de miro hoc explicato phenomeno.

Sed venio ad reliqua errata Tosetti, quæ hac brevis argumentatione continentur, & quibus tota ejus responsio nititur. 1. Nego, modos suam essentiam habere aliis modis affectam. 2. Nego, extensionem corporum esse ens reale, quod habeat essentiam realem secundam a corpore. 3. Nego, Verneium definitiones lineæ, & superficiæ pro germanis realibus

(1) Pag. 142. Corollar. de substant.

(2) Hoc vitium plurimorum Philosophorum animadvertit, & notavit ipse Cartesius Princip. part. 2. n. 9. Nonnulli cum substantiam ab extensione aut quantitate distinguunt, vel nihil per nomen substantiæ intelligunt, vel confusam tantum substantiæ incorporeæ ideam habent, quam falso tribuunt corporeæ, hujusque substantiæ corporeæ veram ideam extensioni relinquunt, quam tamen accidens vocant: atque ita plane aliud afferunt verbis, quam mente comprehendant. Eadem acceptione loquitur Rohaultius Phys. c. 7 n. 14. Observandum est, substantiæ naturam esse, existere posse sine modo suo, & ab eo minime pendere: Modi contra, non posse existere sine substantia sua.

huc habere. 4. Nego, *lineis*, & *superficiebus* *sejunctis a corpore* *innumeras accedere posse modificationes Physicas*. 5. Nego, *ex definitione Verneii talia inferri posse absurda*. Quæ singula cum effecero, tum luce clarius cognosces, quam misere Tosettus noster in hac refutatione lapsus sit.

Primum enim falsum est, *modos internos esse aliquid reipsa ab essentia rei diversum*. Nam extensio corporis (nisi Peripateticorum opinionem de *formis accidentalibus distinctis* iterum in scenam revocare velimus) reapse nihil aliud est, quam *ipsum corpus extensum*: quod Verneius eodem loco diligenter demonstravit. (1) Deinde falsum est, *dari modos modorum*. Sed illud, quod a nonnullis explicandi gratia vocatur *modificatio modi*, (2) est reapse *modus ipsius corporis*. v.g. *Figura quadrata non est reapse modus extensionis corporis*, sed est *modus rei corporeæ*, seu *corpus hoc modo figuratum*. *Velocitas non est reapse modus motus*, sed est *modus corporis mobilis*, seu est *idem corpus, quod tali modo movetur*. Tantum voce tenus, & claritatis causa dicuntur *modificationes modi*. Quæ cum evidentia sint, non egent probatione. Ergo falsum est, *modos suam essentiam Physicam habere aliis molis affectam*. Ex quo falsitas primæ, ac secundæ propositionis Tosetti demonstratur, quod erat efficiendum.

Venio ad tertiam. Falsum etiam est Verneium scripsisse, *definitiones lineæ, & superficiei, ut a Geometris accipiuntur, esse vere reales*. Immo vero contrarium apertissime scriptum reliquit: nam ibidem declarat, *lineam, superficiem, ut a Geometris accipiuntur* (id est, sejuncta ab omni corpore) *nec esse, nec esse posse*: (3) *nec nisi in mente existere*. Si ergo existere non possunt, nulla definitio *realis* earum cogitari, nulla dari potest: propterea sunt *definitiones nominales*.

* Quoniam igitur sensu eas Verneius *reales* vocavit? nempe eo sensu, quo paulo ante locutus fuerat de *definitionibus*

B

bus

(1) Ibid. pag. 143. Corollar. de Modis.

(2) Verneius, ut iis morem gereret, claritatis gratia, & ipse hac loquendi formula usus est, pag. 119. loquens de *abstractione*: sed ibidem monet, esse *ideam abstractam*, & *nusquam esse posse sine illis, a quibus separatur*. (3) Ibid. pag. 89.

bus vere realibus : quia quod ad præsentem rem pertinet, naturam rei definitæ plane exponunt . Cum enim nihil aliud Mathematici de talibus ideis abstractis constituere velint, quam quod definitione illa continetur ; tali significatione naturam rei definitæ plane exponunt . Audi Verneium ipsum eodem loco disputantem in hunc modum : (1) *Hinc definitiones idearum nostrarum interdum sunt reales . Nam tametsi dum definitio ideas, definitio nomen ;* (Tossettus hoc vocabulum, quo controversia omnis dirimitur, non animadvertit) *tamen hæc definitio interdum naturam rei definitæ plane exponit : ut se habent definitiones aliquæ Mathematicorum, v.g. definitio puncti, lineæ, superficiæ, & reliqua . Dixi, interdum, nam pleræque, ita se non habent .* Quid si Verneius non ita clare suam sententiam proponeret ? Vel ipsa definitio puncti, quam assert, quid ipse cogitasset, ostenderet : nam punctum Mathematicum nec umquam fuit ullum, & a Verneio constantissime negatum est . Ergo quod tales definitiones secundum Verneium lata acceptione vocari possint *reales*, non facit *vere esse reales* . Ergo Tossettus, qui eas pro vere realibus sumpsit, Verneii sententiam consulto depravavit, quo facilius ei culpam aliquam obijcere posset : quod quam dignum sit homine Philosopho, videant Philosophi ipsi .

Veniamus ad quartam . Hinc falso ait Tossettus, *lineis, & superficiebus* (seorsum a corpore) *innumeras accedere posse modificationes* : supple *Physicas*, nam de his quæstio cum Verneio est . Nam seorsum a corpore nec lineæ, nec superficies ullæ sunt : sed sunt tantum abstractæ ideæ, quas Mathematici una cum aliis ideis ex rebus corporeis acceperunt, deinde eas a ceteris secreverunt, quo facilius alio, & alio modo considerantes, aliasque cum aliis comparantes, diversas *rationes*, ac *proportiones* invenirent, ex quibus aliquas veritates deducerent .

Quare possunt illi quidem pro lubitu naturam quamdam lineæ, ac superficiæ dare, *modos* in iis cogitare, ut proprietates aliquas eliciant : sed hæc non efficiunt, ut singula, quæ Mathematici in his cogitant, *vera*, ac eodem modo corporibus conveniant . Itaque si de *modificationibus*
Mathe-

(1) Ibid. pag. 131. corollar. 2.

Mathematicis sermo est, concedo dari posse modificationes lineæ, modos modorum, ceteraque: sin autem de modificationibus Physicis, de quibus agimus, sermo instituitur; constanter pernego. Ut autem Tosettus aliquid efficeret, non essentiam Mathematicam, aut Metaphysicam, considerare deberet, sed essentiam Physicam: quæ negata, ut Verneius non uo tantum loco supradictis rebus apertissime negavit, Tosetti argumentatio evanescit. Hæc ex sententia veterum Geometrarum Verneius disputat, qui puncta, lineas, superficies considerant non ut partes extensionis, sed ut extremas ejusdem modificationes. Quod si ex Recentiorum disciplina loquimur, qui puncta, lineas, superficies, non ut modificationes, sed ut partes constituentes extensionem concipiunt, tunc alia ratione vera est opinio Verneii: de quo tamen in præsentia non disputamus.

Sequitur quinta. Falsum itidem est, *ex definitione Verneii sequi, extensionem, triangulum, lineam, superficiem, esse substantias*. Nam, ut supra demonstravimus, hæc non habent essentiam ullam Physicam sejunctam a corpore, quæ considerari possit seorsum & suis modis, & ad modos relata, quod ex communi acceptione adversariorum Verneius requirit. Ergo non possunt concipi aliis modis affecta.

Quod si Tosettus Metaphysicorum veterum more contendit, se bene concipere naturam lineæ sejunctam a corpore, & modum lineæ, ceteraque hujusmodi; non contendam adversus eum pro illiusmodi nugis Metaphysicis; modo illud nobis concedat, quod negari non potest, ejusmodi ideas esse abstractas, quæ nihil re ipsa ponunt. Nam si a regno Physico ad Metaphysicum gradum facimus, non modo illud, quod vult, Tosetto concedam, sed hoc amplius, Chimæram habere suam essentiam, suas proprietates, suos modos: concedam item, Rationale posse considerari ut essentiam, cujus sit proprietas hoc, & illo modo cogitare: voca substantias, voca modos, voca ut tibi magis placuerit, non repuguabo. Quid tum? an hæc, aliaque ingenii commenta facere possunt ut dicamus, ejusmodi res re ipsa existere, adeo ut essentiam sejunctam a modis cogitare possimus, quod est substantiæ? minime. Nihil ergo agit Tosettus dum ideis illis suis Metaphysicis Verneii definitionem

tionem refutare conatur. Et de his satis. Nunc alia persequamur argumenta Tosetti.

V. „Modum tamen, inquit, sic definit Verneius (1)
 „*id quo substantia hæc vel illo modo est, eamque quodam-*
 „*modo vestit, & ut sensibus percipiat, facit*: quæ qui-
 „dem definitio tum obscurissima est, tum etiam manca,
 „quia incorporearum substantiarum modi numquam effi-
 „ciunt, ut eæ sensibus percipiantur. Cum igitur Verne-
 „iana substantiæ definitio probari non possit, priorem il-
 „lam cum superioribus Metaphysicis adhuc retinebo, &
 „*primum subiectum ejus, quod est, aut sit, quod ita existit,*
 „*ut intrinsecus a nullo pendeat*, substantiam appellabo. „

ANIMADVERSI O.

Quod *modus sit, id quo substantia* (in sensu vulgato advertariorum, pro *substantia Physica*, seu *intima rei natura*) *hæc vel illo modo est*, quæ est ipsa *nominis* definitio; nemo nisi Tosettus negat: propterea nec hic responsione opus est. Quod vero addit, *explicationem illam, eamque quodammodo vestit, & ut sensibus percipiat, facit* (quæ duplicata hoc loco idem significant) esse *obscurissimam*; non negavit esse posse Tosetto; cui cetera etiam, quæ planissime Verneius scripsit, tam obscura visa fuere, ut ea ne legere quidem, aut considerare curæ habuerit: ceteris vero omnibus apertissimum est, hæc duo incisa clarius explicare definitionem *modi*. Nam esse *hæc vel illo modo*, quod germana definitione *modi* satis esse posset, hoc significat, esse *ornatam vel quodammodo vestitam* (2) *his & illis modis,*

qui

(1) Metaph. libro 4. cap. 4. pag. 138.

(2) Nec hanc *metaphoram* perspicuam tolerare voluit severus verborum censor noster Tosettus: satis morose tamen, ne dicam injuste, nam & ipse translatis verbis frequenter utitur etiam in syllogismis: cuius exemplum habes in primo syllogismo adducto supra numero I., qui ita se habet: *Anima hominis si ea ipsa agit in corpus, illi saltem cerebri regioni præsens sit oportet, in qua nervorum capita coeunt, vel quæ coeunt. Etiam si vero in unum punctum coeunt, semper est punctum physicum, & extensum. Hanc ergo regionem tota occupat anima præsentia sua: quod etiam alibi scribit. Quæro, illæ regiones cerebri, illa capita nervorum, illud coeunt, non sunt metaphoræ? quis neget? nihil ergo causa video cur id Verneio detur cu-*

qui eam quodammodo sensibus subjiciunt, & ut sensibus percipiatur faciunt. Quis latine sciens, nec hospes in iudicando, ejusmodi explicationem non intelligat? At Tossettus noster, vir sane utroque genere doctus, tamen non animadvertens Verneio ab omnibus, qui de his judicare possunt, id laudi dari, quod etiam in argumento difficili & intricato apertissime, quod sentiat, exponat; eam obsecuritatis condemnat, ac Geometrarum accuratorem & methodum requirit. Eugepæ!

At enim, urget, *manca est definitio, quia incorporeæ substantiæ sensibus non subjiciuntur.* Papæ! quam nova, quam mira observatio! scilicet judicavit Tossettus, Verneium eo stultitiæ devenisse, ut asseverare non recusarit, substantias incorporeas in hac mortali vita oculis videri, manibusque posse tractari. Sed parce metu, Tossetti, satis salvæ res sunt: nec adeo desipuit Verneius, ut talia deliraret. Nempe Verneius Philosophos omnes, quos amicos habet, imitatus, ex effectis perspicuis, & sensilibus, sentiendi, volendi, cogitandi, disputandi, & ejus generis ceteris (qui sunt *modi* ipsius rei) naturæ ratione exploratum habet, esse in corpore humano animum incorporeum: atque hujusmodi argumentis Materialistas, ceterosque confutari posse sibi persuasit. (1) Ex quo verissime, atque planissime dicere potuit, *modos incorporeæ substantiæ facere, ut ipsa quodammodo (nota bene) sensibus subjiciatur.* Sed Tossettus, qui, ut supra demonstravimus, bellum non rebus, sed vocabulis, quæ in Verneii libro se offerunt, apertissimum & acerrimum intulit; & hic duo illa vocabula,

B 3

Quod-

(1) Etiam argumenta Metaphysica graviora, quibus utuntur Philosophi non hypothetici, ut efficiant *animum esse incorporeum*, in hoc versantur tota, ut, collatis inter se perspicuis proprietatibus corporis & animi, demonstrent, proprietates corporis toto cælo differre ab animi proprietatibus, & e contrario. Quare ut aliis hanc veritatem probemus, necesse est, proprietates animi, quæ in omnibus hominibus sensibus percipiuntur, colligamus; eorumque effectus perpendamus, ut id *Materialistis* persuadere possimus. Non enim, quæ conscientia tantum cognoscimus, sed, quæ sensibus externis percipimus, asserere necesse habemus, ut ipsi etiam faciunt Materialistæ. Nec Recentiores modo, sed etiam veteres Scholastici tale argumenti genus præcipue adhibuerunt; ut legi potest apud B. Thomam *Contra Gentiles* l. 2. c. 65.

Quodammodo, & nexum *Et*, quæ ostendunt, quam verè eade, ut Rhetores præcipiunt, his metapnoris Verneius uti voluerit, loco movere, ac exterminare sui muneris esse putavit. Quod si orationis contextum accuratius legeret, ejusmodi Logomachias, Sophista magis, quam tali Philosopho dignas, opinor effugeret. Quod si Tossettus novam aliam viam invenit, cur *naturæ ratione* (nec enim de *divina locutione* sermo est) animi humani proprietates, atque naturam illis, qui negant, demonstraret; habeat, eaque fruatur: Verneius vero se non nisi ex effectis sensilibus ad causas progredi, nec alio rationum naturalium genere id ipsum aliis persuadere posse ingenue profitetur.

Quod attinet substantiæ definitionem a Tossetto traditam, sincere tibi fateor, Stay, illam adeo obscuram mihi videri, ut nihil supra. Neque enim plane intelligere possumus, quid sit *primum subiectum*, quid *intrinsecus a nullo pendere*: eaque audita, in eadem ignorantia interioris systematis rerum corporearum me versari sentio, quo eram ante: quod idem Peripateticorum definitionibus vitio vertebatur. Est itaque definitio *nominis*, non *rei*, quia nihil amplius nos docet de natura corporis. Sed ad Tossettum redemus.

VI. „ Quod vero, *inquit*, posita materiei in infinitum
„ divisibilitate, nulla vel penes Deum futura sint prima
„ corporum elementa, quæ tamen non nisi ab ipso Deo.
„ creari potuerunt; aperta adeo res est, ut Petrus Marti-
„ nus *Philosoph. Natur. lib. 1. cap. 6. §. 112.* infinitæ divisibi-
„ litatis propugnator acerrimus, id ultro concesserit: nec
„ ego ullum, qui inficietur, adhuc inveni. „

ANIMADVERSIO.

Miram colligendi viam! scilicet, *Martinus id ultro concessit: ergo aperta res est!* Quid si Martinus erravit? quid si ex præjudicata opinione, atque ex usu ea definiendi, quæ definire non possumus, deceptus est? Nodus hic ad solvendum est difficilis. Tamen Verneius eodem loco monuerat, *se non Philosophorum nomina, sed rationes querere*. Sed hæc Tossetto nostro e memoria exciderunt.

Verum Cl. Martino germana sententia est vindicanda: neque enim ille deceptus est, sed Tossettus, qui talia Martino tribuit, de quibus numquam cogitavit. En verba Martini loco citato. *Itaque cum materia constitutio talis sit, ut nulla detur portio adeo parva, quæ in alias minores partes resolvi non possit; liquet Deum non posse ita materiam secare, ut detur pars ultima indivisibilis.* Martinus igitur negat quidem, dari ultimam partem indivisibilem, eo modo quo ipse explicat: quod idem est ac dicere, *Deum non posse mutare essentiam materiae, cujus proprietas est divisibilitas:* sed nusquam ait, *nulla vel penes Deum futura esse prima corporum elementa:* ille enim pro certo ponit, Deum materiam creasse tali natura præditam, quæ infinite dividi possit. Et ibidem §. 120. ait, *Deum hac in re quosdam limites constituisse, quos natura prætergredi nequeat:* quod idem est ac dicere, *relate ad vires naturæ, esse aliqua certa corporum elementa: relate ad Deum, infinitas particulas esse materiae elementa.* Non ergo negat, Deum aliqua elementa, quid quid tandem illa sint, creare posse.

Quod vero addit Tossettus, se neminem, qui id dixerit, invenisse; paradoxum profecto est. Nam omnes Orthodoxi & Veteres, & Recentiores, qui corpus infinite secari posse defendunt, pro certo habent, corpus a Deo in prima rerum fabricatione conditum fuisse. Ergo etiam pro certo habent, *aliqua elementa fuisse, quæ Deus creavit.* Quo modo, inquires? nesciunt: tamen res illis certissima est: ut etiam creatio materiæ ex nullo præcedente subiecto, quam non intelligunt; ut etiam complexio corporis & animi, itemque cetera phænomena Physica, quæ explorata habent, & quorum causas se penitus ignorare, planissime contententur. Itaque non idem significat, *materia est infinite divisibilis;* & *materia, seu materiae elementa* (vel quo alio nomine vocare tibi placeat) *creari a Deo non possunt:* nam illud Philosophi admittunt, hoc non item: sed differte fatentur, Deum creasse Materiam hac proprietate præceteris præditam, ut infinite secari possit. (1) Recte itaque

B 4

Recentior

(1) Eodem modo philosophatus est Cartesius, Principior. part. 2. n. 2. *Quin etiam si fingamus, Deum efficere voluisse, ut aliqua materia particula in alias minores dividi non possit, non tamen illa proprie indivisibilis*

Recentiores aliqui, ut cavillandi occasionem tollant, distinguunt *elementa corporum*, & *elementa materiae*: illa sunt determinata, hæc vero non item; sed infinitus numerus partium erunt materiae elementa; seu, ut Leibniziane loquar, ratio sufficiens compositionis materiae. Consule Cl. Turre loco cit. (1) qui hæc, quæ Tossettus apud neminem se legisse scribit, planissime & accuratissime demonstrat. Immo vero domesticum, eumque clarissimum scriptorem (2) consulere ipse posset, qui infinitum a Deo creari posse contendit. Sed pergamus ad alias rationes Tossetti.

VII. „ At Verneii argumentationem prosequamur. *Ad-*
 „ *dunt, extensionem sine soliditate in eadem re simplici esse*
 „ *posse: ut se habet anima hominis, quæ simplex est, & ex-*
 „ *tensa. Extensa! cur ita? queris? quia cum anima agat*
 „ *in corpus, oportet ei loco cerebri sit præsens, in quo ner-*
 „ *vorum origo, quorum ope motus membrorum sit, existit.*
 „ *Nervi autem minimum in uno aliquo puncto Physico origi-*
 „ *nem habere debent: quod punctum certe extensum est. Er-*
 „ *go anima, quæ ei puncto præsens est, extensa & ipsa sit*
 „ *neceffe est. Altera fallacia. At, inquit, sunt in hac*
 „ *sententia Rudigerus, Morus, Culworthus, ceteri. Quid*
 „ *ad nos? quasi nos Philosophorum nomina, non rationes*
 „ *queramus. Cur autem eorum philosophandi viam rejicia-*
 „ *mus, in promptu est. Primum nullam hi Philosophi ideam*
 „ *claram habent naturæ animi nostri: deinde nullam de*
 „ *moto, quo est in cerebro: tum nullam de ratione, qua mo-*
 „ *vet corpus: quæ duo non nisi ex effectibus probare possunt.*
 „ *Male igitur ponunt pro comperta rem &c.* „

„ His antequam respondeam, animadverto primum,
 „ corporum extensionem secernendam esse a mentis exten-
 „ sione, quam, si malueris, extensioni corporeæ *substan-*
 „ *tialem*

sibilis eris dicenda. Ut enim effeceris eam a nullis creaturis dividi posse, non certe tibi ipsi ejus dividenda facultatem posuis adimere, quia fieri plane non potest, ut propriam suam potentiam imminuat... Atque adeo proprie loquendo illa divisibilis remanebit, quoniam ex natura sua est talis.

(1) *Scienza della Natur. Tom. 1. parag. 35. & 67. Napoli 1748. Et iterum in Institus. Physic. Tom. 1. sect. 2. cap. 3. n. 125. 26.*

(2) Corfinium in *Physic. Generali tract. 3. cap. 2. pag. m. 319. Bonon. 1742.*

„ *talem mentis præsentiam appellabo, ut in hac differtione declaratum habes. Animadverto insuper, & palam fateor, argumentum pro incorporea quadam extensione, seu medullæ cerebri mentis nostræ substantiali præsentia, a me adductum, & a Verneio impugnatum (fabulæ) penes eos Philosophos, qui harmoniæ præstabilitæ, vel causarum occasionalium systemata sibi seligunt, nullius esse roboris, ac momenti. Habere autem vim maximam penes eos, qui systema influxus Phisici, seu realem actionem inter corpus & animam admittunt, adhuc mini persuadeo. Illud sic breviter contra-ho. „ (*enemonstrativus Tosetti syllogismus.*)*

„ Mentis substantia ibi præsens est, ubi agit. Mens autem nostra, si quidem realem exercet actionem in corpus, agit saltem in eam cerebri partem, in qua nervorum capita coeunt. Extensioni ergo cuidam corporeæ anima hominis substantia sua præsens est.

„ Argumentationem hanc fallaciam vocat Verneius: „ (*non ex Tosetti lectione, sed ex lectione illorum, qui multo ante (1) ea usi fuerunt*) At hanc ego fallaciam „ plane

(1) Putat Tosettus nosse, se aliquid novum hic nobis dare, nam ait: *Argumentum, quo utor, vim maximam habere debet.* & pag. 17. n. XI. scribit: *Se validissimum argumentum hoc syllogismo habere, quo extensionem animæ tribuat, & Peripateticos ab obreftationibus vindicat.* Sed ego nihil hic video novum, quo non Philosophi multo ante usi sint. Immo vero sine ullis ambagibus, & multo clarius a Peripateticis dicebatur, animam esse per totum corpus diffusam, quia corpus re ipsa vivificat; quia est forma substantialis corporis; quia in omni corporis parte aliquid agit. Audi Conimbricenses de Anima l. 2. cap. 1. art. 2. assert. 1. *Anima informat quamlibet partem corporis, . . . quia nulla substantia corporea vivit, nisi quia habet animam. Adde eum unicuique composito naturali uno tantum in se forma substantialis, necessario animam in toto corpore esse.* Et infra: *Itaque anima ex gr. secundum aspectum in oculis, secundum auditum in auribus, secundum phantasiam in cerebro incidet.* Quæro nunc: nonne hæc argumenta ponunt tamquam certum, animam ibi præsentem esse, ubi agit? quid ergo novi assertit Tosettus, dum confugit ad nervorum capita, nisi rem, quam Veteres aptissime enuntiarunt, circuitione verborum obscuriorem facere.

Quid? Swammerdamius, Perraultius, Stahlus, ejusque discipuli, qui mordicus tuerentur, omnes motus & vitales & animales ab anima proficisci, nonne animam his motibus in toto corpore præsentem faciunt?

„ plane non video : nisi forte quasi certum statuendum
 „ putet, substantias ibi agere, ubi non sunt : aut, me in-
 „ vito ac reluctante, velit argumentum adversus Carte-
 „ sium fia-

ciunt? Vide Stahlum de *Motu tonico* pag. 29. 30. *tome 1. Differt. Ha-
 la* 1707. Quid? nonne (ut de la Chambre, aliosque omitam) Morus
 de *Immortal. animæ* cap. 8. 10. 11. ex effectu cogitandi, volendi, spon-
 tante movendi nervos, vel mutandi directionem motus in conario;
 itemque ex effectu sentiendi, atque agendi in singulis partibus corpo-
 ris, infert, animæ partem intellectivam in quarto ventriculo cerebri,
 plasticam vero in toto corpore esse? Ergo hæc ratio colligendi ex actio-
 ne animæ præsentiam, ex præsentia in plurimis locis extensionem, tam
 vetus est, quam quæ maxime.

Sed ut videas quam fallax sit hæc colligendi via, animadvertite, ali-
 quos Philosophos ab eodem Tosetto laudatos, ex eodem principio con-
 trarium inferre. Leibnizius (ut habes in nota, quæ sequitur, & in
Troisième Ecrit de M. Leibniz. n. 35. Recueil de diverses piéces, tom. 1.)
 concedit, animam immediate præsentem esse corpori, & cerebro: ni-
 hilominus ait, *inde non sequi, animam esse extensam*. ibi n. 37. *Il est*
aussi inexplicable, que l'Ame soit diffusée par le cerveau, que de faire qu'
elle soit diffusée par le corps tout entier. Cartesius animam præsentem toti
 corpori facit, & arctissime conjunctam cerebro, & conario, in quo ner-
 vorum originem ponit, & ibi aliquid etiam exiguum agere dicit. (*Proba-
 tur autem evidenter animam non quatenus est in singulis membris, sed*
tantum quatenus est in cerebro, ea, quæ corpori occidunt in singulis mem-
bris, nervorum ope sentire. Princip. p. 4. n. 196. eadem repetit Dioptri-
 cam cap. 4. n. 1. 2. 3.) Et tamen extensam esse negat. Ergo ex eodem
 principio, præsentia, & agitatione nervorum, vel mutatione direc-
 tionis spirituum, colligunt alii, non posse probari animam esse extensam.
 Contra vero Tosca philosophus Gassendianus in *Metaph. Reali* l. 1. cap. 4.
 prop. 30. etiam concedat animam esse præsentem capitibus nervorum, eaque
 agitare; tamen ex hoc fonte non putavit deduci posse, eam esse exten-
 sam; sed ex alio capite, nempe quia quidquid est, extensum est: quo
 posito, animam per omnes partes corporis extendi, quia, inquit, nulla
 est ratio, quæ ita unam partem convincat, ut aliam falsam esse demon-
 stre. Ergo Tosetti principium atque argumentatio evidens non est,
 nam contrariis propositionibus opitulatur.

Sed ad rem propius veniamus. Ipsissima argumentatio Tosetti opo-
 posita fuit Clarkio a Leibnizio. Concedebat Clarkius, animam esse
 præsentem sensorio, & agere in capita nervorum: hoc modo: *l'Ame agit*
seulement sur le cerveau, ou sur certains nerfs, & sur les esprits. *Troi-*
sème Réplique de M. Clarke n. 12. concedebat non esse præsentem in
 unico tantum puncto: *Quoi que l'Ame soit indivisible, il ne s'ensuit pas*
qu'elle n'est présente que dans un seul point. *Seconde Réplique* n. 4. Sed
 ecce

„ fians, & Leibnitianos, qui nullam agnoscunt inter
 „ mentem, & corpus realem actionem, a me proferri.
 „ Quod ego tamen in ipso, quem examinat, & reprehendit
 „ Verneius (*iterum fabula*) lucubrationis meae loco,
 „ maxime caveram. Ibi enim sic habet: *Argumentum*,
 „ *quo utor, vim maximam habere debet penes eos omnes,*
 „ *qui harmonia praestabilita, & causarum occasionalium*
 „ *systemata rejicientes, verum commercium corpus inter*
 „ *& animam, mutuaque actionem, & passionem agno-*
 „ *scunt.* „ (1) Haecenus ille.

ANI-

esse praesentem in tota sua sphaera: *ibidem* n.5. Negabat tamen, esse extensam per totum cerebrum. *L'Ame n'est pas repandue dans le cerveau, mais elle est présente dans le lieu, qui est le sensorium. Quatrieme Replique* n.37.

Opponebat Leibnizius: Tu concedis, animam esse praesentem loco, in quo agit, nempe nervis in sensorio. Sensorium est extensum: ergo etiam anima. *On me dit, que l'Ame n'est pas dans le cerveau, mais dans le sensorium, sans dire ce que c'est que ce sensorium. Mais supposez que ce sensorium soit étendu, comme je crois qu'on l'entend; c'est toujours la même difficulté, & la question revient, si l'Ame est diffusée par tout cet étendu, quelque grand, ou quelque petit qu'il soit. Cinquieme Ecrit de M. Leibniz.* n.98. Quid ad haec Clarkius? admittit animam implere sensorium, sed negat habere partes distinctas, & independentes, ut habet materia. *Cinquieme Replique de M. Clarke* n.98. Ergo Clarkius concedit, ex actione in capita nervorum, quae sunt in sensorio, sequi animam implere sensorium: sed non sequi, animam habere partes ut materia: nam *l'Ame toute ensiere voit, entend, & pense, comme étant essentiellement un seul être individuel.*

Quid ergo novi avertit Tossettus, nisi ea veluti nova hic repetere, quae & sine superioris saeculi, & initio praesentis Philosophi clarissimi scripta reliquere, idque in libris, qui in omnium manibus sunt, & qui tam notè erant Verneio, quam Tossetto?

Nec dissimili argumento Tosca laudatus, qui ante annos 33. Philosophiam vulgavit, in *Metaph. Reali* L.1. C.1. prop.2. probat animam, & spiritus esse extensos, his verbis: *Quidquid enim est, extensum est: non enim esse potest in puncto Mathematico: ergo in Physico, quod extensum est, & potentia divisibile: ergo spiritus saltem in puncto Physico est: ergo habet extensionem.* Quare nihil est cur Tossettus hoc sibi vindicet quasi novum, quod aliis bene multa familiare fuit probandi genus.

(1) Etiam hic fallitur bonus Tossettus: nam argumentum, quo ille utitur, si aliquid efficere possit, tam efficeret contra *Occasionalistas*, & *Harmonistas*.

ANIMADVERSI O

Si Toſettus probe examinaret, quam graves rationes paucis illis verbis Verneius tetigit, & melius de propoſita controverſia judicaret, & penitus cognofceret, ſe Verneii, ceterorumque rationibus nullo modo occurrere poſſe. Sed de his paulo poſt. Nunc ad Toſetti argumentationem, quam ille quaſi Achillem ſuum toti adverſariorum phalangi opponere non dubitat.

Nempe non intelligit Toſettus fallaciam ſupradicti ſyllogiſmi ! nihil tamen apertius ſe offert. Quod ut accuratius efficiam, utar Dialecticorum reſpondendi forma. Distinguo majorem, *anima ibi præſens eſt, ubi agit*, id eſt, non

Harmoniſtas, quam contra *Influxioniſtas*: quod ſic demonſtro. Toſettus ex eo quod *anima præſens eſt capitis nervorum*, quæ agit, colligit, contra Influxioniſtas animam tam eſſe extenſam, quam nervorum capita. Sed *Occaſionaliſte* omnes ponunt etiam tamquam certum, *animam eſſe præſentem iſdem capitibus nervorum*, ex quorum varia affectione varie afficitur ipſa; ponunt *capita nervorum eſſe phyſice extenſa*. Quod, ut ceteros omittam, affirmat Purchotius Phyſic. ſect. 3. c. 2. prop. 2. *Cerebri medulle, ſeu calloſæ parti maxime conjuncta videtur anima rationalis, cum in eam partem omnes totius ſere corporis nervi tamquam in fibrillarum nervorum contextum, deſinant; ibique ſpiritus animales mentem ad cogitandum velut occaſiones quadam determinent*. Et infra: *Anima ſedes ubicumque ſita ſit, non longe ab eo loco, in quem nervi omnes deſinunt, remota eſſe videtur*. Ergo eodem jure contra eos inferre poſſet, animam eſſe extenſam. Præterea *Harmoniſte* & ipſi ſatentur, animam præſentem eſſe corpori, præſentemque in cerebro. Audi Leibnizium ipſum: *L'ont peut entendre par là (l'harmonie) comment l'Âme a ſon ſiège dans le corps, par une préſence immédiate, qui ne ſçauroit être plus grande, puis qu'elle y eſt comme l'uniſé eſt dans le reſultat des unités, qui eſt la multitude. Système Nouveau de la nature. Journal des Savans 1695. pag. 458. Amſterd.* Et iterum: *Outre que l'Âme étant indiviſible, ſa préſence immédiate qu'on pourroit ſ'imaginer dans le corps, ne ſeroit, que dans un point. Second. Ecrit de M. Leibniz. n. 4.* ubi etiam concedit Clarkio, *animam eſſe præſentem cerebro, ſed id non ſufficere, ut objecta externa percipiat*. Confer. Wolfius *Psycholog. Rat.* §. 614. & 620. Ergo etiam contra *Harmoniſtas* valeret argumentum, ſi aliquid poſſet. Verum recte Leibnizius vidit, tale argumentum ex præſentia ductum nihil valere ad probandam extenſionem: ut diximus ſupra in nota, & dicemus paulo poſt n. VIII. in nota.

non agit nisi in fabrica ubi est, concedo: non agit nisi eo loco, & modo, quo ego concipio, nego: Tum eadem ratione nego minorem, & consequentiam. Explico responsionem.

Major propositio est vera tantum lata acceptione: nempe verum est, animum, qui est Romæ, non agere Parisiis: item animum Petri non agere in Paulo. (1) E contrario verum est dicere, animum, qui præest Petro, esse in Petro: item animum, qui cogitat in cerebro, in cerebro esse. At cum omnino ignoremus, quo modo animus complectatur corpus, & quo in loco corporis animus existat; an in toto corpore, an in toto cerebro, an in aliqua ejus parte; propterea certo constituere non possumus, qua ratione animus suum corpus agitet: an ope fluidi cujusdam, an tantum nervorum, an alio modo nobis omnino incognito: (2) nec nisi ex conjectura penitus incerta Philosophi affirmare aliqua solent: quod Verneius in Logica (3) disertis verbis admonuit. Ergo talis propositio quod ad hanc partem, seu *modum agendi*, est incerta omnino.

Minor propositio ea de causa negatur, quia duo pro certis ponit, quæ prorsus incerta sunt. Unum est, *animum, ut agat in corpus, agere debere saltem in eam cerebri partem, in qua nervorum capita coeunt*. Id prorsus incertum est, nec nisi ab eo definiri poterit, qui perspicue intelligat, quo pacto animus moveat corpus: quod nemini mortalium intelligere datum est. Alterum est, *nervorum capita in unam cerebri partem coire*: quod etiam incert-

(1) Eodem modo de Angelorum operatione locuti sunt Patres. Damascenus de *Fide Orthod.* l. 1. c. 17. Et Basilii ait, *Animam vero ex consequenti, ac veluti accessionis instar in loco esse propter habitudinem ad corpus, cum ex natura sue proprietate loco minima circumscribatur. Homil. 2. de Parad.* Eodem modo Nemelius de *Natura Hominis cap. 3.* Vide Hamelium Theol. de *Angelis cap. 5.* ibi: *Circumscribi loco idem est apud PP. ac certo definiri loco, adeo ut ita sint præsentis uni loco, ut alibi non sint: non autem sic toti sint in aliquo loco, ut partes eorum partibus loci respondeant.*

(2) Ego vero existimo (nempe sedem animi) ex iis esse, quæ a nobis explicari non possunt. . . . Quæ adeo obscura sunt, ut quid pro certo affirmemus, non habeamus. Verneius Logica lib. 2. pag. 45.

(3) Pag. 46.

certum est, ut ex accuratioribus Anatomicis eodem Logice loco (1) confecit Verneius. (2) Itaque affirmare pro certis, & exploratis duo, quæ omnino incerta & obscura sunt, est falsum dicere: propterea utraque illa propositio pro falsa etiam haberi potest.

Hinc manifeste demonstratur fallacia adducti syllogismi: quæ in hoc sita est, quod ex altera propositione limitate vera (id est quodam sensu vera, quodam, de quo maxime quæritio est, dubia) ex altera quoad utramque partem penitus incerta (ne dicam quoad utramque partem falsa) certam, & absolutam, ut ita dicam, propositionem inferat. Quid autem est, si non hæc fallacia, & *inductio vitiosa* est?

Sed ut fallacia *inductionis vitiosæ* clarius ostendatur, fac ex sententia Toletti syllogismum hoc modo: *Ego certo scio animum non posse movere corpus, nisi tam sit extensus, quam totum corpus, vel saltem pars cerebri, in qua nervorum capita sunt. Sed animus movet corpus. Ergo tam est extensus &c.* Hic manifestum est, majorem esse falsam. Unde enim certo id novit Tolettus? quis illi certo ac distincte narravit, animum, nisi tam sit extensus, quam corpus, vel saltem quam cerebri pars, movere id non posse? quis illi omnes modos explanavit, quibus animus movere corpus possit; ut certo dicere queat, aliis modis non movere, hoc tantum movere? idem de nervorum capitibus dicendum est. Unde enim Tolettus certo habuit, animum

(1) Ibid. pag. 46.

(2) Nervos animales & voluntarios, de quibus hic sermo est, non in unam cerebri partem coire, ut hic affirmat Tolettus, exploratum Anatomicis est. Diserte id docet Boerhaavius. *Nullibi vero*, inquit, *exstat punctum aliquod, a quo totum nervorum systema oriatur. Praeterea. Volum. 2. §. 296.* Immo Hallerius ex sententia Boerhaavii, & Ridley, fatetur, omnes nervos & a cerebro, & a cerebello fibras habere. In not. ad Boerhaavium de somno §. 600. pag. m. 596. seqq. sed cum ibidem assermet, olfactorium a cerebro unico provenire; ex cerebello vero nervos aliquos animales & voluntarios oriri; organorumque sensuum motus involuntarios item agnoscat; satis clare demonstrat, veram nervorum originem solertissimis, ac diligentissimis Anatomicis adhuc esse ignotam. Vide Hallerium ibi ad §. 273. de Medulla cerebri pag. m. 546. - 47. Et quod mirabilius, ipse Tolettus alio loco, nempe pag. 12. n. V., cum Boerhaavio consentit.

num non alio modo, quam capita nervorum agitando, movere membra? Ergo non enumerat omnes modos movendi. Ergo falso reliquos excludit, unum præfert. Ergo ex propositione aperte falsa falsam conclusionem inferat necesse est.

At enim, inquires, potest Tosettus dicere hoc modo: *Ego probabiliter judico, animum non posse movere corpus, nisi sit extensus &c.* Esto: sed quodnam argumentum probabile affert ut id dicat? Ego nihil aliud ex ejus scriptis colligere possum, nisi quia sibi persuadet, *animum non posse movere corpus, nisi saltem tam sit extensus, quam nervorum capita.* At id nos supra falsum esse demonstravimus. Ergo quaecumque se in partem vertat, falsum principium ponit, nempe rem omnino dubiam pro explorata. Ergo paralogismi reus est, atque ex enumeratione vitiosa colligit vitiose: non enim ille non dico certe, sed ne probabiliter quidem enumerare potest omnes modos, quibus animus movere possit corpus, ut ceteros excludat, unum tantum admittat.

Hactenus syllogismum Tosetti peccare ostendi, admittens illum thesi nostræ adversari. Nunc presse demonstrabo, idque ad hominem, uti vocant, talem syllogismum aliud probare, quam quod probandum erat, quod est aliud sophismatis genus. Quod ut clarius intelligas, perpende illud, quod tali syllogismo præmittit. Primum aperte fatetur Tosettus, *extensionem animi esse diversam ab extensione corporis.* (1) Deinde fatetur, *talem animi extensionem nihil aliud esse, quam substantialem mentis præsentiam corporeæ extensioni.* Igitur, si extensio animi differt omnino ab extensione corporis, nec aliud est, quam esse re vera præsentem rei in qua agit; sequitur, *animum re ipsa non esse extensum.* Quis enim adversariorum umquam negavit, animum reapse præsentem esse corpori, in quo agit? Si nihil aliud quærit Tosettus, concedi potest integer syllogismus, quin aliquid conficiat adversus Verneium: omnes enim, & qui influxum Physicum admittunt, & qui rejiciunt, concedunt, *animum esse præsentem corpori, in quo*

(1) Idem repetit Tosettus pag. 22. *Spiritusum extensionem ab extensione corporum apprimè differre.* Et pag. 23. *Aliam esse corporum, aliam mentium extensionem.*

quo vel re ipsa agit, vel saltem agere nobis videtur; uti supra demonstravimus. Sed hæc longe differunt a *vera extensione*.

Quod si aliquid amplius colligere vult: v. g. si dicat: *Anima re ipso præsens est corpori: ergo re ipsa tam est extensa, quam ipsum corpus*: primum sibi non constat, deinde paralogismum admittit. Non constat sibi, nam si animus tam est extensus quam corpus; ergo *extensio animi est similis extensioni corporis*: ergo *spiritus figuram habet*: ergo *non est tantum substantialis præsentia*: contra id, quod posuit. (1) Paralogismum facit, nam hæc argumentatio: *Anima præsens est corpori: ergo est extensa*; est aperte falsa; non secus atque hæc: *Anima existit in corpore figurato: ergo est figurata*: itemque hæc: *Deus est præsens omnibus corporibus: ergo est extensus. Occupat totum mundum figura præditum: ergo est eadem figura præditus*. Cum enim de modo, quo res incorporea præsens sit, ideam nullam habeamus; qui ex *vera præsentia rei incorporeæ* infert *veram extensionem ejusdem*; ex principio quod ad naturam rei sibi penitus ignoto infert aliquid, cujus nullam habet notionem, idest, *ex principio incerto infert propositionem certam*: proinde paralogismi reus est.

Quid? nonne Tossettus dum rationem talis extensionis a se querit, respondet, *Budacius, quam par sit, hæc a nobis inquiri*? (2) nonne se auctoritate Cl. Moshemii tuetur, qui modelle fatetur, tale quid sibi esse incognitum? Nihil igitur explorati de tali re habet Tossettus: propterea inconsiderate id affirmat. (3)

At

(1) Nulla si accurate loqui velimus, mentis substantia figura tribui potest. Tossettus ibid. pag. 23. (2) Ibid. pag. 21.

(3) Rectius faceret Tossettus si eidem Moshemio auscultaret ita moventi: *Utrum Deus, & animi simplices extensi sint quodammodo, nec ne? tractandum & dirimendum aliis committo. Utraque pars difficultas premitur, quibus solvendis, & explicandis nemo mortalium par est. Et infra declarat eos, qui affirmant, verbis tantum differre ab illis, qui extensionem negant. Plurimi eorum, inquit, qui Deum, & animos extensionis esse statuunt particeps, cum postea ad hujus sententiæ illustrationem, & extensionis, quam spiritibus tribuunt, declarationem pergunt, tot opinionem suam sepimentis vallant, totque distinctionibus muniunt, ut ab ea parte, cum qua dissentire volunt, parum abesse videantur. Ad System. Intell. cap. 5. Sect. 3. §. 53. nota 2.*

At enim Toſettus ibidem (1) ait, *Corporis, & ſpiritus extenſionem diſſerre, quod illa ſit ſolida, hæc nullo modo: & adducto Auguſtini loco, ita claudit: Habes ergo mentis extenſionem ab extenſione corporum omnino diverſam. Fateor id dicere, ſed, nulla ratione Philoſophica probat. Porro Auguſtinus laudata Ep. 166. alias 28. ad Hieronymum, non dicit, animam eſſe extenſam longitudine, latitudine, altitudine, quod vult Toſettus; ſed eſſe incorpoream, & indiviſibilem: immo vero addit, non eſſe corpoream, ſi corpus accipiat pro re extenſa triplici dimenſione. En verba Auguſtini:*

Si corpus eſt omnis ſubſtantia, vel eſſentia, corpus eſt anima. Item ſi eam ſolam incorpoream placet appellare naturam, quæ ſumme incommutabilis, & ubique tota eſt, corpus eſt anima, quoniam tale aliquid ipſa non eſt. Porro ſi corpus non eſt niſi quod per loci ſpatium aliqua longitudine, latitudine, altitudine ita ſiſtitur, vel movetur, ut majore ſui parte majorem locum occupet, & brevior brevior, minusque ſit in parte quam in toto; non eſt corpus anima. Per totum quippe corpus, quod animat, non locali diſſuſione, (en ſolutio controverſiæ, quam non conſideravit Toſettus) ſed quadam vitali intenſione porrigitur. Nam per omnes ejus particulas tota ſimul adest, nec minor in minoribus, & in majoribus major; ſed alicubi intenſus, alicubi remiſſus, & in omnibus tota, & in ſingulis tota eſt. Qui quidem locus ſummum probat, animam eſſe indiviſibilem, eſſe in loco definitive, ut Schola vocat, ac proinde non eſſe vere extenſam. Nam eſſe extenſam re ipſa, ut vult Toſettus, hoc ſignificat, eſſe trine dimenſam, longitudine, latitudine, & altitudine: id eſt eſſe commenſurabilem ſpatio, eſſe figuratam. Quod ſi Toſettus putat, aliquid eſſe poſſe re ipſa extenſum, quod non ſit trine dimenſum, fatemur id tale myſterium eſſe; quod nec nos homunciones mente informare poſſumus, nec Toſettus ulla arte Philoſophis umquam perſuadebit.

Tantum autem abeſt, ut Auguſtinus animam re ipſa extenſam faciat, ut contra integro libro de *Quantitate anime*, omni argumentorum genere perſuadere conetur, ani-

C

mam

(1) Ibid. pag. 22.

mam omnis extensionis esse expertem : atque ibidem aperte distinguit *praesentiam*, & *extensionem* animæ ; demonstratque animam esse aliquid , quamvis *extensa* non sit . *Quanta sit anima*, inquit, *tibi respondere non possum* : sed *possum affirmare*, neque illam longam esse, neque latam, neque robustam, neque aliquid horum, quæ in mensuris corporum quæri solent Non solum tibi ex eo anima nihil esse videatur, quod in ea non invenis longitudinem, sive aliquid tale ; sed eo pretiosior, & pluris æstimanda sit, quo nihil horum habet . (1) Et intra : Profec̃to quia anima corpus non est procul dubio caret spatio, quo corpora metiuntur : & ob hoc quæri, aut cogitari, aut intelligi talis ejus quantitas non potest . (2) Et eodem capite declarat, animam esse virtute sua præsentem corpori, quamvis non sit *extensa* re ipsa . Quid mirum, inquit, si anima neque corporea sit, neque ulla aut longitudine perrecta, aut latitudine diffusa, aut altitudine solidata : & tamen tantum valeat in corpore, ut penes eam sit regimen omnium membrorum, & quasi cardo quidam in agendo cunctarum corporaliū motionum ? Eadem persequitur sequentibus capitibus, immo vero addit, argumentum illud ductum ex sensu in singulis corporis partibus, non efficere animam esse re ipsa *extensam* . Nunc attende potius, inquit, quid aliud asseras, quo convincas animam vti longam, vel latam esse, vel quid hujusmodi, nam illud argumentum tuum de tangendi sensu, sentis non attingere veritatem, nec valere aliquid, ut eam per totum corpus, tamquam sanguinem, diffusam esse convincat . (3) Quid clarius ? frustra igitur Augustini auctoritate se munire contendit Tosettus . Et quamquam Augustinus in constituenda significatione corporei, & incorporei, varius sit ; dum animas comparatas cum Deo corporeas, cum corpore autem incorporeas dicit ; Angelos vero ex corpore, & spiritu constantes facere videtur ; ut ex primo loco supra descripto perspicuum est, idque luculenter docet Petavius (4) ac Berti ; (5) tamen factis constans est in docendo, animam non esse re ipsa *extensam* ; quod opinioni Tosetti prorsus contrarium est .

Quid

(1) Ibi cap.3. (2) Ibi cap.4. (3) Cap.30.

(4) De Angelis lib.1. cap.2. n.10. & cap.3. n.12. & cap.4. n.1. & 2.

(5) De Theologic. Discipl. lib.10. cap.2. pag.257. - 58.

Quid si Augustinus animam re ipsa extensam faceret? an coacti essemus omnes eodem modo philosophari? An ignorat Tossettus Augustinum ex Platoniorum disciplina multa protulisse, quæ ceteris Philosophis non arrident, & quæ nullo modo admitti possunt: quod nec ipse doctissimus Berti, strenuus ceteroqui Augustini defensor, negare ausus est? (1) Profecto memoria tenere debuisset Tossettus illud, quod de auctoritate sive paucorum, sive plurium Patrum, in iis, quæ naturæ lumine continentur, una omnium voce dicunt Theologi cum clarissimo Cano: (2) scilicet *tantum pollere, quantum ratio naturæ consentanea persuaferit*. Quare nullum in tali casu ex Augustini loco firmum argumentum deduci posset. Quod etiam de Ambrosii loco, quem profert, dicendum videtur. Eo magis, quod liber de *Dignitate Humanae conditionis*, quem citat Tossettus, non est Ambrosii: quod Monachi S. Mauri diserte docent. Deinde, quia etsi esset Ambrosii, nihil aliud talis locus efficit, quam animum esse indivisibilem; non tamen efficit, esse re ipsa triplici mensura extensum, quod vult Tossettus.

Fatendum est igitur, Tossettum suo se gladio jugulare. Primum, quod *extensionem spiritus* ab *illius præsentia* non distinguit; quod idem est ac negare *veram animi extensionem triplici mensura*, de qua controversia in præsentia est. Deinde, quod rem talem nobis persuadere cupit, cujus nec ipse habet ideam, nec eam aliqua ratione, aut similitudine naturali probabilem facere potest: extensionis enim corporeæ ideam omnes habemus, spiritualis vero nullam. Postremo, quia etsi daremus, animum quodam sensu vocari posse extensum; tamen cum Tossettus sine ulla circuitione planissime fateatur, talem extensionem *esse apprime differentem ab extensione corporea; atque extensionem improprie appellari*, (1) quod idem est ac dicere, non replere spatium trina dimensione; nullum inde argumentum duci potest ut efficiamus, *veram extensionem, & simplicitatem in corpore una esse posse*: propterea argumen-

C 2

tum

(1) Ibid. (2) De locis Theologicis lib. 7. cap. 3.

(1) Tossettus ibid. pag. 22. & 23.

tum Tosetti *aliud omnino probat, quam quod probandum est.*

Quod si adhuc de fallacia dubitas, revoca rationem Tosetti ad unum syllogismum hoc modo: *Animus non modo habet proprietates omnino diversas a corpore, sed nominativum extensio animi est apprimè diversa ab extensione corporis, & improprie vocatur extensio. Sed animus est simul indivisibilis, & improprie extensus. Ergo etiam corpus erit indivisibile, & vere extensum.* Quis non videt huic syllogismum esse meram fallaciam? Quis non illico animadvertit, quatuor hic terminos præcipuos, contra leges boni syllogismi, se offerre: nempe 1. *animus*, 2. *extensio ejus omnino diversa a corpore*, 3. *corpus*, 4. *extensio ejus omnino diversa ab animo*; proindeque non esse eundem medium terminum? Immo vero ex eo quod animus habet proprietates omnino diversas a corpore, itemque extensio animi improprie vocatur extensio, atque toto cælo differt ab extensione corporis; inferre deberet Tosettus, *illam indivisibilitatem, quæ præcipua spiritus proprietas est, corpori convenire non posse*: & e contrario, *illam extensionem, quæ aperte proprietas est corporis, animo convenire non posse*. Saltem ut moderatissime philosopharetur, hoc modo inferre deberet: *Ergo nescimus, an indivisibilitas corpori, an extensio animo convenire possit.* Quocumque autem modo accipere velis, semper Tosettus de paralogismo postulat. Hæc satis perspicua sunt, quare non opus est alias rationes conglomerare. Audi ea, quæ restant.

VIII. „ Quod si, inquit, animadvertisset Verneius
 „ (nempe argumentationem Tosetti in *systemate tantum in-*
 „ *fluxus physici* (1) *vim maximam habere*) perspexisset
 „ sane, futilia esse, quæ congerit: *nullam hi Philosophi*
 „ *ideam claram habent naturæ animi nostri: nullam de mo-*
 „ *do, quo est in cerebro: nullam de ratione, qua movet cor-*
 „ *pus.* Quid enim refert hæc ignorari, dummodo anima
 „ in totam cerebri medullam re ipsa agat? An de natura
 „ Dei claram & adæquatam ideam habemus? an de modo
 „ quo nobis intime præsens est? an de ratione, qua omnia
 „ conservat, & movet? Quis tamen idcirco negaverit, nisi
 „ in-

(1) Jam supra demonstravimus n. VII. in not. hic falli Tosettum.

„ ineptire voluerit ; divinæ substantiæ ubique præsentiam,
 „ & actionem non revelatione tantum , sed etiam ratione
 „ absque ulla fallacia demonstrari ? „

ANIMADVERSI O.

Habes hic , Stay , memorabile documentum , quam facile præpostera consuetudo de rebus , quæ mente percipi non possunt , judicandi , homines etiam doctissimos , ut Tossettus est , transversum rapiat : quod breviter demonstrabo . Sed ante considera aliud Tosseti Sophisma . *Quid refert* , inquit , *hæc ignorari , dummodo anima in totam cerebri medullam re ipsa agat ?* Hæc propositio duplicem interpretationem habet , & in utraque manifesta se offert *petitio principii* . Primum hoc dicere vult : *Certum mihi est , animam in totam cerebri medullam re ipsa agere . Ergo ut dicamus illam esse extensam , nihil refert intelligere animæ naturam , & modum quo agit .* Ubi manifestum est , Tossettum ponere tamquam certum & perspicuum , *animam tali modo agere* . At hoc ipsum in quæstione est , & id negat Verneius in Logica , & Metaphysica , ab ullo mortalium definiri posse . Omnino enim incertum est , an anima , ut moveat corpus , agere debeat in totam cerebri medullam , an in aliquam illius partem , an moveat musculos alio modo incognito . (1) Ergo Tossettus hic *petit principium* . Deinde hoc dicere vult : *Certum etiam est , animam si tali modo agit , esse revera extensam triplici dimensione .* Quod etiam in quæstione est , disputatur enim , an *anima ut agat in corpore , esse debeat extensa triplici dimensione* . Verneius negat , Tossettus ait , atque id pro certo hic sumit . Ergo *petit principium* . Quid si non peteret ? nihil efficeret , semper de paralogismo accusaretur : nos enim paulo ante demonstravi-

C 3

mus.

(1) Id satis demonstrant plurimæ , & diversæ de hac re Philosophorum opiniones . Scholastici animam certo modo corpus movere dicunt . Cartesius suo modo . Morus alio modo sibi peculiari ; nempe *perceptivam* partem animæ ponit in cerebro , *plasticam* partem in sensibus , idque necessario auxilium spirituum . Swammerdamius , Stahlus , ceteri , singulari motu tonico & vitali . La Chambre miro quodam modo ab reliquis diverso . Clarkius , & Newtoniani reliqui verum motum admittunt , sed modum explicare se non posse dicunt . Reliquis supersedeo .

mus, ejusmodi confectarium: *Anima in corpus agit, erga est vere extensa*; esse falsum, esse sophisma, & esse contrarium eidem Tosetto. Verum hæc obiter. Venio ad reliqua sophismata, quæ hic admittit Tosettus, & quæ tali ratione demonstro.

Nemo homo, ut tu optime scis, Stay, habet ideam claram animi nostri. Tantum ex effectis, qui nulli corpori congruere possunt, inferimus, esse in homine rem, quæ non est corpus, id est indivisibilem, quæ sentit, intelligit, ratiocinatur, libere vult, ceteraque: quæ cognitio argumentatione acquisita quod ad existentiam rei, clarior; quod ad naturam, est penitus obscura. Hinc nemo exponere potest, quid reipsa sit animus noster: an sit hoc potius, quam illud: quam vim habeat: an hoc, atque illud facere possit, an non. Quare nihil de spiritu nostro naturæ ratione asserere possumus, nisi illud tantum, quod ex rebus, quas efficit, perspicuum est. Quid animus præterea facere possit, quid aget seorsum a corpore, nescimus: nulla hic analogia rerum corporearum nos juvare potest. Hæc plane perspicua sunt.

Præterea ignoramus omnino, quid sit insensibilis cerebri nostri fabrica, cuique usui singuli tubuli, cui bullæ, cui sinus, cui nervi, cui singulæ fibræ sint. Quod non veteres Anatomici modo, sed gravissimi quique, & accuratissimi recentiores sincere professi sunt. (1)

Illud autem mente complexi prorsus non possumus, quo modo animus & corpus, duæ res natura adeo differentes, conjungantur, adeo ut animus pro arbitrio suo corpus agitet, ab eoque mutuo afficiatur. (2) In hoc negotio tanta ignorantia laboramus, quantam ipsa varia systemata, quæ a Philosophis excogitata sunt, ut eam complexionem

ex-

(1) *La meccanica del cervello è tanto incognita, quanto è difficile la dimostrazione della struttura delle sue differenti parti: dico di quelle ancora, che più dell'altre si credono conosciute.* Winslow. Esposizione Anatomica del Corpo Umano. Tomo 5. pag. 4. Bologna 1743.

(2) *Modus quo corporibus adherens spiritus, & animalia fiunt, omnino mirus est, nec comprehendendi ab homine potest.* Aug. de Civit. Dei l. 2. cap. 10. Adde Tosettum pag. 27. ibi: *Ignorat profecto mens quo adminiculo, quo instrumento, quo actionis genere, arcanos hosce motus in corpore ipsa eadem velut domina, & arbitra efficiat.*

explicarent, apertissime ostendunt. Nihil enim tales hypothefes nos doctiores fecerunt: nec adhuc certo definire possumus, an animus in solo cerebro sit: multoque minus, quo pacto ibi tamquam in arce, ac sede sua resident; quoque modo & ratione, quibus auxiliis membra flectat. (1) Hæc a nemine sanæ mentis negari possunt.

Fac igitur, Stay, hoc ipsum, quod exploratissimum omnibus est, pro una enthymematis propositione assumes hoc modo: *Nemo intelligit, quid sit natura animi nostri, quas vires, quas proprietates habet, præter eas, quæ sensibus hauriuntur, aut ex iis necessaria consecutione nascuntur.* Ergo recte concludimus, *animum nostrum esse vere extensum.* Sume tibi alteram propositionem hoc modo: *Nemo intelligit, quid sit natura, ac fabrica cerebri humani; ubi omnino desinant nervi; quoque modo animus in eo sit.* Ergo recte colligimus, *animum tam esse extensum, quam nervorum capita.* Sume tertiam in hunc modum: *Nemo mente percipit, qua ratione animus noster corporis fabricam agitet, an nervorum ope, an alio præsidio, & quomodo: nemo quo pacto corpus vicissim animum afficiat: sed tantæ hic tenebræ se offerunt, quantæ alibi nusquam in toto Physico regno.* Ergo recte inde colligimus, *animum in totam cerebri medullam re ipsa agere, illique parem extensione esse.*

Quis hic non videt, tria hæc esse sophismata, nempe ex re omnino involuta & incerta certam conclusionem sine ulla dubitatione colligere? At id non vidit Tossetus, qui cum in animum induxisset, nullam in primo illo syllogismo esse posse fallaciam; ut id nobis probaret, talem responsonem excogitavit, in qua plura & apertissima sophismata vel primo aspectu se offerunt.

Conter nunc, Stay, cum illa colligendi formam Verneii ex tribus illis propositionibus, quæ ita se habet. *Nemo intelligit qualis sit natura animi nostri, nec alias proprietates, præter illas, quas sensibus quodammodo percipimus, notas habet.* Ergo constituere nemo potest, an ani-

C 4

mus

(1) Perspicue id etiam efficiunt varix Philosophorum opiniones, de modo quo muscoli, quorum ope moventur membra, ipsi moveantur: dum aliud videtur Stenoni, aliud Cartesio, aliud Bernoullio, aliud aliis.

mus sit extensus, an secus. Item, Nemo exploratum habet, quamquam sit interior fabrica cerebri humani, ubi consistant nervi, quoque modo animus in cerebro sit. Ergo definire non potest, animum tam esse extensum, quam nervorum capita. Tum, Nemo mente potest completi, qua ratione animus corpus suum moveat, & ab eo vicissim moveatur. Ergo finire non potest, an animus totam cerebri medullam occupet, an secus. Te iudicem volo, Stay, uter recte colligat, Verneius, an Tosettus.

Quod addit Tosettus de præsentia, & actione Dei, quam simile sit, viderit ipse. Nam *immensitas* Dei proxime, & perspicue manat ex hoc principio naturæ ratione demonstrato: *Deus est ens perfectissimum*, id est *necessitate naturæ suæ existens*, ideoque *ex omni parte infinitum*. Ergo *nec præsentiæ suæ limites habet*, seu *est immensum*. Quod corollarium præterquam quod evidens est, tam claris Sacrarum litterarum testimoniis confirmatur, ut nulla dubitandi ratio se offerre queat. At tamen pro verisimili ponamus, ut ponit Verneius (non enim id pro Metaphysice demonstrato habet) ab animo re ipsa moveri corpus; itemque animum esse in cerebro; nullo modo hinc sequitur, nec hujus propositionis est corollarium: *Ergo animus tam est extensus, quam ipsum cerebrum, vel nervorum capita*. Nam nullo pacto cognitum habeo, ut ante demonstravimus, *quo modo animus sit in cerebro*: itemque *quot modis animus movere possit corpus, quot modis non possit*. Ergo decernere non possum, hoc tantum modo, ceteris rejectis, in loco esse: hoc tantum modo corpus posse movere. Male igitur colligo, eam non alio modo musculos movere, quam tantam extensionem occupando, quantum vel totum cerebrum, vel nervorum capita occupant: sed in tanta rerum obscuritate a iudicando, ut Philosophum decet, abstinere debeo.

Quid? eodem argumento suo solide ac efficaciter labefactari potest Tosettus hoc modo: Quamquam summa, id est infinita perfectio Dei cogat nos ut dicamus, eum nullis limitibus definiri, adeoque esse immensum; tum omnia & condere, & moderari; tamen cum nullam claram ideam habeamus naturæ, ac potentiz Dei decernere non possumus, qua ratione sit præsens omnibus, qua ratione
res

41

res condant, easque conservet. Ergo etiam, quamvis ex animi effectis, qui in cerebro maxime perspicui sunt, verissimiliter inferre debeamus, animum esse in cerebro; tamen cum claram non habeamus ideam naturæ animi, ejusque facultatum, nec item fabricæ cerebri, aut interioris systematis membrorum; definire nullo modo possumus, quo pacto in cerebro resideat, quaque ratione membra flectat. Sed Tosettus non alio ex fonte ducit, animum esse extensum, nisi quia pro certo sumit, *non posse reapse agitare cerebrum, vel aliquam sui partem, nisi vel ipsam partem, vel solidum cerebrum extensione aquet*; quod ipsum vel falsum est, vel saltem omnino incertum, ut paulo ante n. VII. confectum habemus. Ergo Tosettus paralogismo argumentatur, dum infert *propositionem certam, & universalem* ex principio penitus incerto. Male igitur ex tali principio colligit, *animum esse vere extensum*. Multoque sapientius faceret Tosettus, si Leibnizium suum imitaretur, qui coactus a Clarkio, fateri religioni non habuit; nec Deum esse vere extensum, nec animam talem dici posse: nihilque de animæ sede, nec recte, nec clare dici, sed per abusum verborum: nec ex ejus præsentia colligi posse extensionem. (1) Sed iterum Tosettus urget.

IX. „ Quod autem post rationum momenta alios quoque Philosophos pro mea sententia citaverim, cur mihi vertatur crimini a Verneio, prorsus ignoro. Id passim in more est, non ut Philosophorum nomina rationis loco substituamus, sed vel ut novitatis fugiamus invdiam, vel ipsos fontes, ex quibus doctrina aliqua hausta fuerit, indicemus. „

(1) Dieu n'est pas présent aux Choses par situation, mais par essence & sa présence se manifeste par son opération immédiate. La présence de l'ame est tout d'une autre nature. Dire qu'elle est diffuse par le corps, c'est la rendre étendue, & divisible: dire qu'elle est toute ensiere en chaque partie de quelque corps, c'est la rendre divisible d'elle même. L'attacher à un point, la répandre par plusieurs points, tout cela ne sont qu'expressions abusives. Toisième Ecrit de M. Leibniz. n. 12. Recueil de Diverses pieces. tom. 1.

Nihil tam dolet Tosetto nostro, quam non posse cuiquam persuadere, se a Verneio peti, ac singulis prope periodis per summam injuriam refutari: verum dum graviora argumenta non affert, numquam persuadebit. Quod autem ad Verneii attinet verba, quæ supra numero VII. descripta habes, nulli ibi vitio vertitur, quod auctores suæ sententiæ nominet: sed postquam Verneius Adversariorum sopnifma, quod etiam amplexatur Tosettus, protulit, id unum miratur, Adversarios, cum argumenta, quæ cogant, nulla proferant, subito ad auctorum magna nomina confugere solere, quasi aliquid demonstratum proferrent. Quod si Verneius id Tosetto crimini dare voluisset, sine ulla injuria dedisset: nam ipse Tosettus vel una propositione Leibnizii adducta, quæ manifestum paralogismum continet, *se argumentum demonstrativum, argumentum ut maxima præditum* proferre dixit: tum vel uno citato Martino, se *rem apertam* affirmasse, asserere non dubitavit, ut supra diversis locis demonstravimus. Hoc ipsum peccant alii, qui in eandem sententiam disputant. Hoc vitium commune plurium reprehendit Verneius, non tamen nominatim petivit Tosettum. Sed pergit ipse in hunc modum.

X. „ Ad materieî divisibilitatem revertitur tandem Verneius. Male igitur ponunt, inquit, pro comperto rem, quam nullo modo intelligunt, ut inde efficiant, negari debere extensionem divisibilem materie, quam omnes perspicue intelligunt, tametsi non intelligunt, quo modo qualibet pars infinite secari possit. Quis enim, qui sine ulla anticipatione, sine ulla hypothesei judicet, ejusmodi disputatores ferre possit? aut quis (cetera Verneii verba mutilavit Tosettus, sed exscribenda hic sunt, quia quam maxime ad rem faciunt) germanus Philosophus non potius dicat, hæc clare intelligo, illa non intelligo? Ego vero eligo potius plane fateri, me talia nec explicare, nec intelligere posse, quam tales hypotheses pro veris in hac Philosophiæ luce viris oculatis obtrudere. Sed de his alio loco est disputandum. „ Nihil aliud habet Verneius.

„ Si quam omnes perspicue intelligunt, ut Verneius asserit, est materieî divisibilitas in infinitum, viderit „ ipse

„ ipse an omnes re vera perspicue intelligant. Arbitror tamen ei non latere, infinitam materiæ divisibilitatem tum a Leibnizianis omnibus, tum ab Atomistarum plerisque, tum a Cartesiorum nonnullis vel prorsus respui, vel in dubium revocari. Dicam tamen ex Philosophis, qui Ontologiam accurate, & systematice pertractaverint (*hoc mihi videtur dicere, Verneium nec accurate, nec systematice eam pertractasse. Scilicet!*) neminem esse, qui infinitam materiæ divisibilitatem probet, quippe crassam sapiat Metaphysicam. „

A N I M A D V E R S I O .

Nempe Tosettus noster non potuit temperare sibi, quin paralogismis, ex quibus tota ejus confutatio constat, adderet contumeliam, atque Verneio fictam hanc culpam obijceret, eum nec *accurate, nec systematice Ontologiam pertractare, sed crassam Metaphysicam*, veluti recoctam crambem, lectoribus propinare. Sed hæc illi maledicta libenter condonamus, eaque, ut nos decet, missa facimus. An autem recte, quod caput est, Tosettus judicet, an aliter, videbunt Philosophi affectibus ac præjudicatis opinionibus vacui. Venio ad id, quod ad nostram rem pertinet, & in quo est summa controversiæ.

En argumentatio Verneii, quæ illis verbis continetur, & quam veluti *crassam Metaphysicam* irridet Tosettus. Omnes, qui non omnino delirant, exploratum habent, atque aperte fatentur, quancumque materiæ seu corporis partem, quæ sensibus subjicitur, secari posse. Sed Philosophi ex analogia argumentando (qua una duce ex sensibilibus rebus ad insensiles pervenire se posse dicunt) pro certo ponunt, particulas materiæ, etsi sensus superant, & subtilissimæ præter opinionem sint, ejusdem esse speciei ac materia, quæ sensibus subiecta est. Ergo ex eadem analogia argumentando inferre debent, insensiles materiæ particulas hæc etiam proprietate gaudere, ut dividi possint. Huc usque nihil non perspicuum se offert: nec id nobis negaturum puto Tosettum. Hinc vero illud, de quo controversia est, perspicue inferitur. Ergo quæcumque partes materiæ cogitari possunt, quod materia sunt, quod figuram habent, dividi possunt, hæc rursus partes dividi sine ullo fine.

Hic

Hic vero intercedunt adversarii, & negant, partēs infinite secari posse. Quam ob rem? quia videtur illis omnino perspicuum, non posse dari infinitum absolutum. Cur non? quia aliter nulla essent prima elementa corporum, quæ Deus crearet: Deus enim infinitum efficere non potest. En celebris adversariorum responsio.

His ita respondet Verneius. Omnino vos de *infinito absoluto* nihil cognoscitis, nec constituere potestis, an esse possit, an non. Item de effectiōne seu *creatione materiae* nullam notionem habetis, nec finire apti estis, quæ requirantur ut Deus eam condere possit: item an hoc Deus facere possit, an aliter. Ergo ex duobus principiis incertis, & omnino incognitis, male infertis, *insensilibus materiae particulis non convenire eas proprietates, quæ sensibilibus particulis perspicue conveniunt*: si modo ponitis, ut profecto ponitis, utrasque particulas ejusdem naturæ, ac *speciei infimæ* esse. Nisi forte putatis, continuata divisione mutari naturam materiae: quod ridiculum, & Abderitium profecto est.

At enim, reponunt, intelligere non possumus, *materiam sine ullo fine secari posse*. Fateor, reponit Verneius: quid tum? an quod non intelligatis *infiniti absoluti* naturam, quam nemo intelligere potest, negare debetis, *quamlibet particulam materiae sensibilibus dividi posse*; quod ipsum perspicuum omnibus est, & ex quo analogiæ præsidio perspicue illud infertur, *quancumque insensilem particulam item dividi posse*? Quis hoc ferre possit, negare perspicuam consecutionem ex principio evidentissimo, hoc nomine, quod non intelligamus, quo modo conclusio se habeat? (1) Nos ex eo quod Deus necessitate naturæ suæ existit, perspicue inferimus, a nullo limitari posse, id est, esse in omni genere infinitum: & hinc esse immensum &c. Et quamquam non intelligamus, quo modo Deus sit absolute ex omni parte infinitus; tum immensus, &c. tamen quia perspicue cognoscimus, ex illo principio evidenti talem conclusionem natura suarum profi-

(1) Numquid ideo negandum est, quod apertum est, quia comprehendere non potest, quod occultum est? numquid, inquam, propterea discursivus sumus, quod ita esse perspicimus, non ita esse, quoniam, cur ita sit, non possumus invenire? Aug. de Dono persev. 2. 37. alias cap. 14,

proficisci, idcirco eam pro vera ponimus. Ergo etiam quamvis non intelligamus, quo modo infinitæ partes in uno aliquo corpusculo contineantur; tamen quia ex perspicuo principio, nempe *divisibilitate materiæ sensibilibis*, evidenter sequitur, *quamlibet particulam secari posse*; etsi id non intelligamus, pro vero tamen habere debemus. (1)

Itaque alterutrum amplecti necesse habetis: Vel negare debetis analogiæ leges in materia valere; atque affirmare coacti estis, partes insensiles alterius esse speciei, aliasque habere proprietates ac partes sensiles; vel si semel ponitis, analogiæ hic locum esse, infinita materiæ divisibilitas vobis velitis nolitis penitus est concoquenda. Quod si infinita hæc materiæ divisio (2) stomacho vestro gravis ac molesta est; abstinete, amabo vos, ab ejusmodi controversiis, in quibus nihil intelligere, aut constituere potestis; & ex quibus nullum lumen Physicæ disciplinæ, ejusque partibus, quæ aliquid utilitatis habent, asserre potest: ut sunt præ ceteris omnes quæstiones Physicæ, quæ ad infinitum absolutum revocantur. Hæc diligenter eodem loco exponit Verneius, (3) & in hunc modum concludit: *Factor id intelligi a nobis non posse, sed alterutrum amplecti necesse est: vel negare debemus perspicuas proprietates materiæ, ea de causa, quod non intelligamus, quo modo corpus infinite secari possit; vel abstinere ab ejusmodi disputationibus, in quibus nihil clare intelligere, nihil finire possumus. Illud Philosophis Recentioribus durum omnino videbitur: hoc autem dignius mihi videtur vero Philosopho.*

Itaque Verneius duo apertissime scribit: Unum, divisibilitatem infinitam ex principio evidentissimo proficisci, quæ proinde a nemine, qui recte judicet, negari potest, ut ut, quo modo se res habeat, mente percipere non possit. Alterum, consultius esse, veroque Philosopho dignius, temperare ab ejusmodi controversiis, quæ nec Physicæ opitulan-

(1) Consule quæ accommodate ad rem nostram disputat Clarke de *L'Existence de Dieu*. Chap. 2. p. m. 19. 20. & toto cap. 3.

(2) Infinita divisibilitas, ut a Recentioribus explicatur, non adeo inepta videtur, ut plerique putant, qui eam quasi delirantium somnia cachinnis excipiunt. Vide *Torre Scienza della Natura* Tom. 1. §. 35. 67. & *Institus. Physicæ*. Tom. 1. sect. 2. cap. 3. (3) *Metaph.* lib. 4. cap. 7. pag. 164. 165.

tulantur, nec nisi ab illis, qui de rebus, quæ intelligi non possunt, loqui amant, tanta animi contentione disputantur. Sed cum horum neutrum consideraret Tossettus, prosequitur in hunc modum:

XI. „Miror autem Verneium, virum alioqui perspicacissimum, controversiam de infinita materię divisibilitate Physicis examinandam relinquere: *Nos eam Physicis, si qui otio disflunt, examinandam relinquimus*: ait loco cit. pag. 164. miror, inquam, cum planum sit & apertum, eam quætionem non nisi ad Ontologiam, & Cosmologiam pertinere. Ut enim ea dirimatur, examinari & statui debet, utrum prima corporum elementa extensa sint: utrum extensio ex partibus realibus necessario resultet, nec ne? quæ duo capita ad unum etiam reduci possunt, utrum nempe extensum ex non extensis necessario coalescat. Id autem definire, an ad Physicam pertineat, an ad Metaphysicam, judicet Verneius ipse, qui ad suam Ontologiam tractationem de *simplici & composito* jure censuit pertinere. „

Hæc de Verneio miratur Tossettus. Nos autem potiori jure miramur, Tossettum, virum ceteroqui doctissimum, & oculatissimum, ea in libris, quos confutandi causa pervolvit, non animadvertisse, quæ vel Philosophiæ tirones primo aspectu animadverterunt.

Primum enim miramur, Tossettum non legisse causam, cur Verneius talem disputationem *Physicis, qui otio disfluant, examinandam relinquere*. Nam Verneius declarat ibidem (quod verba ipsa demonstrant supra numero X. adducta) indignum esse vero Philosopho de rebus disputare, quæ a nobis intelligi non possunt. Deinde ait (1) germani Philosophi esse aperte dicere, hæc clare intelligo, illa non intelligo: nec hypotheses de rebus, quæ intelligi non possunt, quasi aliquid verum in hac Philosophiæ luce viris oculatis obtrudere. Tum paulo ante (2) solido capite demonstravit, nullam nos habere ideam infiniti absoluti: atque disputationes de infinito absoluto nihil aliud esse, quam verba inania: propterea fugiendas esse vero Philosopho. (3) Ergo Verneius eodem loco clarissime docuit, ejusmodi quæstiones nec in Physi-

(1) Eodem cap. 7. pag. 167.

(2) Cap. 5.

(3) Ibid. coroll. 4.

Physica, nec alio loco disputari debere: nec nisi illis disputandas relinquit, *qui otio disuant*, ac tempus inaniter loquendo consumere velint.

Quod si hæc philosophandi ratio non probatur Tosetto, sed de rebus confidenter decernere, quæ nullo consilio intelligi, nullo explicari possunt, id ipsum non *crassam*, sed *subtilissimam Metaphysicam*, & *Philosophiam* vocat, ac in deliciis habet; sua utatur quantum velit, sine Verneio, ac sine me tamen rivali. Verneius enim cum plurimis Philosophis gravissimis constitutum habet, in Physicis non nisi de rebus sensilibus, aut quæ ex sensilibus proxime ac perspicue ducuntur, differere: hoc amplius, ingenue confitetur, se, cum celebratissimas aliquas controversias magis magisque examinat, eo magis intelligere, *meras Logomachias* esse: eoque magis sibi persuadere, *incredibili rerum Physicarum ignorantia non indolens modo, sed etiam doctissimos quosque laborare*: quod illi, qui hypothefibus, ac verbis inanibus non delectantur, de ejusmodi controversiis fatari religioni non habent. (1)

Deinde miramur, Tosettum non intellexisse causam, cur Verneius hoc loco ejusmodi quæstionem tetigit. Nempe cum explanare deberet vim ac usum vocabulorum *simplex*, & *compositum*, quorum in singulis disciplinis usus esse potest; (2) per viam tetigit hujusmodi controversiam, ut ostenderet tironibus, ea, quæ de tali controversia verisimiliter dicuntur, paucissimis verbis expediri posse: sed conducibilis esse, veroque Philosopho dignius, de ejusmodi rebus nusquam differere, quod ad ea tandem disputando veni-

(1) *Pour moi* (inquit Coste interpret Lockii) *j'avoue sincerement, que sur une question si subtile, come sur bien d'autres de cette nature, je n'ai point d'opinion determinee; & que je me fais un affaire de desapprendre tous les jours bien des choses, dont je m'etois cru fort bien instruit. Multa nescire mea pars magna sapientie*. In not. ad Libr. 2. Lockii cap. 13. p. m. 126. 27. Adde quæ supra in nota ad n. VII. diximus de Moshemio.

(2) *Et hæc de vocabulis stricta significatione acceptis*. Verneius in Metaph. ibid. pag. 167. & iterum: *Sed hæc nullius usus sunt, & vel auditis vocabulis, a tironibus non habere intelliguntur*. pag. 168. & tertio ibidem: *Hæc clara sunt, fortasse etiam nullius usus aliquibus videbuntur*. Quid clarius?

venire necesse fit, quorum nullas ideas habemus, adeoque definiri non possunt: ut de talibus disputare nihil aliud sit, quam verba inania fundere sine ullo fructu. (1)

Præterea miramur Tosettum scribere non dubitasse, quæstionem de infinita divisibilitate materiæ non ad *Physicam*, sed ad *Ontologiam* spectare. Nam cum *Physica* de natura ac proprietatibus corporis cum universe, tum sigillatim tractet; (2) ad *Physicum* jure meritoque pertinet examinare (si modo id explorari, & intelligi potest, ut Verneius monuit) an divisibilitas ita sit proprietas materiæ, ut nulla pars materiæ sit, quæ dividi non possit. *Ontologia* vero, quæ nihil aliud est, quam applicatio *Legum Logicæ* ad argumenta quædam generalia, quorum in singulis disciplinis usus est; ut Verneius toto libro 2. docuit, quodque Tosettus memoria tenere debebat; tantum suis finibus continere se debet, nec alienas possessiones invadere.

Quod si explicandi gratia aliquæ res *Physicæ* tangi debent, quod interdum in singulis disciplinis vitari non potest; prætereundo explicari debent, & tantum delibari, quantum ad id, de quo est quæstio, intelligendum satis esse videatur: quod Verneius religiose servavit. Nec hæc reprehendere debebat Tosettus, qui innumeras res medicas in sua *Disputatione* addidit, & uberrime disputavit.

Quarto loco miramur, Tosettum nostrum non intellexisse, *Cosmologiam* (eam dico *Cosmologiam*, quæ aliquid utilitatis *Physico* afferre potest, quæ ad pauca capita reducit: nam plurima, quæ sub nomine *Cosmologiæ*, *Cosmosophiæ*,

(1) Nos ea, quæ necessaria videbantur, ut Philosophorum sermones facilius intelligeremus, tetigimus: cetera his relinquimus disputanda, quæ res subtiles, & quæ nullo modo intelligi, nulli disciplinæ opitulari possunt, delicias suas vocant, easque pro bona Philosophia habent. *Physicæ* vero disputationes, & *Theologicas*, quas hic nonnulli addunt, tamquam ab hac disciplina alienas prætermittimus, suisque locis disputandas reservamus. Verneius *Metaph.* L. 4. c. 16. pag. 224.

(2) Verneius in *Metaphysica* sua L. 4. c. 17. docet etiam *Psychologiam* esse objectum *Physicæ*; quæ ex effectis sensibus naturæ ratione investigat proprietates ac naturam tum rei corporis, tum incorporis a Deo creatarum. In quo a *Theologia Naturali* distinguitur, quæ naturam ac proprietates Dei persequitur lumine naturæ; & a *Dæmonologia*, quæ id ipsum facit ex divina revelatione.

sophiæ, *Cosmogonia* a quibusdam Philosophis, nec iis de trivio, disputantur, non vera Philosophia, sed veræ Logomachia, ac gerræ germanæ sunt, proinde nec legi, nec audiri merentur) non esse partem Ontologiæ, sed *Prolegomena* Physicæ disciplinæ: quod vel ex ipsa definitione nominis tirones intelligunt. Quod si doctissimus Tosettus aliter sentit, cum se, suæque impense amare, atque de tali opinione gloriari, libentissime concedimus.

Illud tamen illi dare non possumus, quod cum laud recte examinarit, quale sit systema Verneii in tradenda Ontologia, quod tamen ille toto *lib.2.de Re Metaphysica* (1) apertissime narravit; & in variis locis, præsertim *cap.ultimo Metaph.* iterum exposuit; quamque vim Verneius singulis his nominibus subjecerit; tamen Verneio culpæ dare non dubitet, quod non se accommodarit ad opinionem Tosetti: id est, eandem interpretandi vocabula rationem non sit imitatus. Et eo magis id nos miramur, quod erat Philosophi, erat Critici, erat Amici, erat demum Religiosi viri non ante aliorum sententias confutandas sibi sumere, quam totum hominis systema, quem adversarium sibi fingere volebat, mente complecteretur: nec aliquid illi non ab eo dictum, nec eadem acceptione tribuere. Sed hæc omnia diluere sibi persuasit Tosettus extremis illis verbis:

XII. „ Quæ hæcenus a me dicta sunt, æqui bonique
„ faciet veritatis, & honestatis amantissimus Verneius, cui
„ scio persuasum, sententiarum inter nos discordiam non
„ esse animorum dissidium. „

Quod ipsum nos graviore de causa Tosetto reponere possumus. Non enim sumus ii, qui Tosetto aliquid, præter id, de quo est quæstio, opponere velimus: qui tamen aliqua in ejus lucubrationibus reperiamus, quæ nobis non arident, nec id sine gravi constantique ratione; tamen iis consulto superfedemus, ut planum faciamus, nos nullam illi litem intentare, nullamque de aliena re controversiam movere velle. Uno enim contenti sumus, si lectori probamus, Verneium in hujusmodi recte philosophatum esse: Tosettum vero Verneii nostri sententiam non modo male esse interpretatum, sed etiam refutandi cupiditate, æstu-

(1) Præsertim cap.4. pag.44. 45.

æstuque altercationis abreptum talia addidisse, quæ digna Tosetto non sunt: & quæ, ut mitissime loquar, miram ejus in legendis, atque expendendis aliorum sententiis negligentiam produunt. Quæ si tollas, de Tosetto magnifice & prædicamus, & sentimus: eumque virum in Philosophicis, & Mathematicis insigniter eruditum, dignum judicamus, qui in graviore ac utiliori argumento pro copia sua versetur: nec veremur ut homo, qui ab urbanis moribus nomen merito suo invenire potuit, nobis vitio tribuere queat, quod amicissimi hominis existimationem contra ejus criminationes, quæ nobis injustæ visæ sint, salvam esse velimus. Non enim accusandi studio, ut initio diximus, nec ut ferram de re adeo levi ducamus, quod mihi puerorum, non Philosophorum esse videtur, talia scripsimus; sed ut veritatem in suo lumine ponamus, suumque jus cuique tribuamus.

Habes doctissime, ac humanissime Stay, quid nos de philosophandi ratione Verneii, quid de refutatione Tosetti judicemus. Uter vero rectius philosophetur, tu optime omnium judicabis: neque enim alium doctiorem, aut graviozem judicem facile invenire possem; nec si possem, quærerem. Tu es enim is, qui ad ceteras virtutes tuas hanc addere curasti, ut de rebus non ex anticipatione aliqua, sed ex merito judicare soleas: quique tanta apud viros doctos auctoritate vales, ut, quæ tibi vera videantur, ceteris nullo negotio vera esse persuadeas. Quare quin in tuo judicio ceteri, qui verum unice quærunt, acquiescant, causa nulla est cur dubitem. Vale, & nos ama. Romæ Kalend. Decemb. Anno Christi MDCCLIV.

F I N I S.